



INSAIT

Wantok  
**Today**  
P9, 10, 19, 20

**Laipstail**  
Komyuniti projek kamap  
long Sentral Manus - P15

**Wol nius**  
**poto - P16**



# PNG i no gat helt standet

Frieda Sila Kana i raitim

**POPULESEN** o namba bilong ol pipel long kantri i wok long go bikpela hariap tru na ol bikpela sevis bilong gavman olsem helt na edukesen i wok long sot yet long inapim nid bilong pipel.

Olsem na helt dipatmen i mas gat helt standet long olgeta lain husat i givim aut helt sevis i mas bihainim.

Insait long nius long dispela wik, Profesa Glen Mola, wanpela bikpela dokta bilong ol meri i tok mak bilong ol bebi i kamap long wan wan yia em i 2.3 pesen. Em i olsem

long wanpela yia bai namba bilong ol pipel i go antap olsem 1 milien moa.

Namba wan dokta na Dairekta bilong Paradais Praivet Haus sik long Pot Mosbi, Dokta Sios i tok PNG i no gat wanpela helt standet i stap long ol haus sik, na ol helt sevis i ken bihainim long lukautim helt bilong ol pipel.

"Insait long las 40 yia ol helt standet i bin pundaun na i no gat gutpela standet. Olsem na mipela olsem wanpela nesanel praivet haus sik stret i laik kamapim gutpela standet bilong helt sevis. Long dispela as mipela i laik wok bung wantaim dispela namba wan haus sik long wol Fortis Heltke long givim gutpela sevis long ol sikman na meri husat i kam long mipela," Dokta Sios i tok.

Wantaim dispela tingting, Dokta Sios na meri bilong em Janet, tupela papa bilong namba wan praivet haus sik long kantri, Paradais Praivet Haus sik nau i go long wok poroman wantaim wanpela biknem haus sik long India, Fortis Heltke.

Long dispela wik Tunde, Paradais Pravet Haus sik i tokaut long tripela speselis dokta bai kam long Fortis Heltke haus sik long India long sekim 40 sikman na meri husat i givim nem pinis long ol kain sik we Paradise Praivet Haus sik i bin luksave long ol. Ol dispela dokta em long dokta bilong hat bilong ol bikpela man na meri, dokta bilong stretim ol bun na join bilong bodi, na Nephrology em sik bilong ol kitni na ol narapela hap bilong bodi i stap insait long man o meri.

Ol dispela dokta bai kamap long Pot Mosbi long Sande 29 Novemba na ol bai sekim ol siklain inap long Desemba 3 na bai ol i go bek.

Fortis Heltke em i wanpela haus sik we i go pas long givim ol integred helt ke maket long hap bilong Pan Asia-Pasifik rijon. Em i gat 52 haus sik wantaim 12,000 bet, na moa long 210 daiagnostik senta na 18,000 ol dokta na ol narapela teknikal man na meri i gat moa save long givim helt sevis.

**I go moa long pes 2...**

## PM O'Neill em man tu ya, i no masin!



Praim Minista Peter O'Neill i soim stret olsem em i lida tru bilong ol pipel bilong PNG. Las wiken tasol em i bin stap wantaim ol lida bilong wol olsem Presiden Barrack Obama bilong Amerika long Asia Pasifik Ekonomik Kopresen (APEC) kibung long Manila, Filipins. Long Mandem em i flai long balus i kam olsem long Singapo. Long wankain taim ol pipel bilong Madang i stretim ol ples na bilas i stap long Praim Minista i go opim Pasific Marine Industrial Zone (PMIZ) projek long Madang, tasol em i no inap kamap long taim. Long Tunde, em i kamap long Mosbi, na givim taim long moning long go na opim PNG Maining na Petroleum komprens na bihain em i go kalap gen long balus na go long Madang long opim dispela PMIZ projek long ai bilong planti tausen pipel. Dispela poto i soim Praim Minista i klinim tuhat na aiglas bilong em na toktok wantaim Embeseda bilong China Li Riyong, IPBC Minista Ben Micah na Tred, Komes na Indastri Minista, Richard Maru. Ating dispela hatpela san bilong Madang na wait karanas bilong Vidar i mas wokim Praim Minista i tuhat stret. **Poto na stori: James G. Kila**

**Reach anyone in PNG on the friendlier network**

Switch to bmobile-vodafone at a store near you.



76003555

[www.bmobile.com.pg](http://www.bmobile.com.pg)

Connect with us on






# Air Niugini i kisim IOSA setifiket

**AIR Niugini i kisim setifiket bilong Operesenel Sefti Odit (IOSA) wantaim Intanesenel Air Trensport Asosiesen bihain long ol i pasim gut dispela program long las mun.**

IATA Operesenel Sefti Odit (IOSA) program em i intanesenel evaluesen sistem ol i mekim bilong stretim operesenel na kontrol sistem bilong ea lain strongim sefti na kwaliti bilong ol balus.

Air Niugini em i wanpela kampani tasol em i orait long operet long kantri.

Sif Eksekutiv Opisa, Simon Foo, skelim dispela setifiket wantaim Sivil Eviesen Sefti Atoriti- PNG na Dairekta, Wilson Sagati, long las wik Fraide.

Foo i tok, "Setifiket em bilong luk-save long Air Niugini Limited i save gat ol Operesenel Sefti Sistem na

dispela i save aburusim hai level we IATA i save makim."

"Em i no wanpela isi odit tasol Air Niugini i pas long dispela program na mipela i amamas."

Foo i tok tenkyu tu long bikpela wok we CASA PNG na ol woklain i save mekim long helpim Air Niugini long ol yia i go pinis long kisim bikpela mak bilong Operesenel Sefti Standad olsem IATA i save long en.

"CASA PNG i save wok gut wantaim Air Niugini Limited na i save impruvim na developim straksa bilong ogenaisesen na ol polisi long kamap namba wan intanesenel eviesen operesen na sefti," Foo i tok.

Sefti em i namba wan samting long operesen bilong Air Niugini bikos em i nambawan kampani long sevim PNG.



**Piksa i soim Sif Eksekutiv Opisa bilong Air Niugini, Simon Foo, sanap long namel long lep han wantaim ol wokman bilong Air Niugini na CASA PNG.**

# PM O'Neill amamas olsem PMIZ projek wok bai stat



**PM O'Neill wantaim ol minista bilong gavman long seremoni long lukim wok i stat long PMIZ projek long Madang. Poto: James G. Kila**

**James G. Kila i raitim**

PRAIM Minista Peter O'Neill i givim bikpela tok amamas i go long ol papagraun we Pasifik Marin Industrial Zon (PMIZ) projek wok bai stat long wanbel long wok bung wantaim long lukim projek i go het.

Mista O'Neill i bin go stap Vidar long Madang long Tunde long opim ol wok stat bilong dispela projek.

Praim Ministai tokaut olsem dispela PMIZ i stap longpela taim na i no kirap hariap bikos long ol hevi bilong fainens, na tu no gat wanbel i stap pastaim namel long ol papagraun

na stekholda Mista O'Neill i givim tok amamas bihain long sampela lain papagraun husat i bin bringim toktok bilong projek i go long kot.

Long Tunde, mausman bilong ol lain husat salensim projek long kot, Francis Gem i tok sori na i wanbel long PMIZ projek wok long stat.

Moa long 3000 manmeri i bin kamap long lukim PM O'Neill i lonsim PMIZ projek. Planti ol tumbuna singsing grup i samsam long amamasim dispela spesel taim we bai i lukim Madang provins i kamap

Dispela seremoni we i kamap

long Vidar arere long solwara i lukim ol minista bilong gavman olsem Minista bilong Tred, Komes na Industri, Richard Maru, Minista bilong Woks, Francis Awesa, Minista bilong Petroleum na Eneji, Nixon Duban, Minista bilong Fiseris, Mao Zeming.

Dispela PMIZ projek em mani mak bilong en long namba wan hap bilong wok em K287.9 milien i kam long gavman na China Exim Bank.

Ol bikpela wok we bai kamap long Vidar projek sait em bai lukim bikpela 276 mita wof o sip bris kirap we bai lukim bris ya i holim mak olsem 40,000 tan hevi sip

na tu i ken lukautim ol sip bilong pulim pis long solwara.

Bikpela projek developmen wok em Saina, Shenyang I n t a n e s i n o l Teknikol Ekonomik (PNG) Limited bai wokim.

Long Tunde, Gavana bilong Madang, Jim Kas i tok bikpela tenkyu i go long Mista O'Neill na Minista bilong Tred, Komes na Industri, Richard Maru long strongpela sapot blong ol long kirapim dispela projek.

Mista Kas i makim ol pipel bilong Madang na i givim tupela pik na tupela muruk olsem kastom presen i go long Praim Minista Peter O'Neill.

# PNG i no gat helt standet

**I kam long pes 1...**



**Misis Janet Sios i toktok wantaim ol midia lain long Tunde dispela wik. Poto: Frieda Sila Kana.**

Wanpela yia i go pinis, tupela narapela patna long bisnis i bin salim bisnis bilong ol na nau em Dokta Sios na meri bilong em Janet tasol i papa long dispela haus sik.

"Mipela i givim ol gutpela helt ke sevis long ol pipel bilong mipela long sekendri na teseri helt ke sevis wantaim gutpela sekap bilong ol na long givim ol gutpela sans," Misis Janet Sios i tok.

"Ol nupela senis long sevis bilong haus sik i gat apgret bilong famasi long inapim ol standet, 3-pela bet i go antap dependensi yunit, 10-pela bet mateniti wod we inap long standet na nau long kisim ol sejen dokta long ausait i kam em i nara-

sikman na meri na bihain bai ol i ken wokim rot bilong ol long go long India na kisim helpim olsem operesen long Fortis Helt ke haus sik tasol ol bai kam bek gen long Pasifik Praivet Haus sik long kamap orait bihain long opere-

namel long taim ol i makim long en. Sif Maketing opisa bilong bmobail- vodafon, Parag Panjwani, i tok, "Desemba em i taim bilong famili na bmobail- vodafon i makim liklik mani long ol kastoma bilong em insait long PNG i ken toktok wantaim famili bilong ol."

"Mi tok tenkyu long PNG Air long mekim patnasip wantaim mipela na ol laki wina i ken kisim tupela laki tiket," Panjwani i tok.

Dispela dro i stat long 24 Novemba inap 24 Desemba na ol kastoma bilong bmobail- vodafon i ken go insait long dro, sapos ol i top-ap K5 o moa

# Bmobail- Vodafon i putim 20 laki tiket



**TOP AP NA WIN:** Sif Maketing Opis bilong bmobile Vodafone Parag Panjwani na Sif Komesel Opisa bilong PNG Air i holim sim kad bilong bmobile Vodafone long makim nupela promosen bilong ol long givim long ol katoma bilong ol. Sapos ol kastoma i top ap long K5 o mao ol bai gat sans long winim ticket bilong balus long go long wanem hap ol i laik go. **Poto Nicky Bernard.**

Paradise Pravet Haus sik nau i winim 35 yia long wok insait long dispela helt sevis pastaim aninit long tripela patnasip bilong Dokta Sios, Dokta Lam na Dokta Mola.

pela level long kamapim gutpela standet ke bilong ol famili na komyuniti." Em i tok. Misis Sios i tok klia olsem, ol dispela speselis dokta i kam long sekim ol dispela



# Senisim lo bilong votim kaunsil presiden



Kaunsila Nanga Yapao

**WANPELA** kaunsila long Enga Provins i singuatim Inta Gavman Rilesens Minista Leo Dion long senisim lo bilong ileksen bilong kaunsil presiden.

Kaunsila Nanga Yapao bilong Lauanda kaunsil wod insait long Wapenamanda distrik, Enga Provins i les long ol pipel i votim ol kaunsil preiden long 2018 lokal gavman (LLG) ileksen.

Mista Yapao i tok planti pasin korapsen na paul pasin i bin kamap long yia 2012 taim ol pipel i bin votim ol presiden.

Em i singaut long gavman long senisim dispela lo na larim ol wan wan lokal kaunsil i makim presiden.

"Planti pasin korapsen i bin kamap long ples bilong mi. Ol pipel i no bin votim

gut ol kaunsil presiden.

"Planti LLG preiden ileksen long Hailans rijon i no bin kamap gut.

Ol vota na kendidet i no bin bihainim lo stret tasol ol i bin mekim paul pasin, stilim ol ballot pepa na bokis, vot tupela o tripela taim, na pait na trabel tu i bin kamap,"Mista Yapao i tok.

Em i singaut long Deputi Praim Minista Leo Dion na lilektoral Komisn long lukluk long dispela samting na larim ol kaunsil yet i makim presiden.

"Ilektoral Komisn i bin tok planti kaunsil presiden ileksen i bin kamap feil ileksen. Mi les long lilektoral Komisn i westim mani long ranim gen saplimentri o bai ileksen bilong LLG presiden,"Mista Yapao i tok.

## Gavman mas pasim ol bia fektori

WANPELA komyuniti lida long Enga Provins i singuat long gavman long pasim ol bia fektori insait long kantri na stopim bia bikos bia tasol i wok long kirapim planti trabel na pait insait long komyuniti.

Kopen Kongo, husat i wanpela lokal komyuniti lida long Laiagam long Enga Provins i mekim dispela singaut bihainim long em i skelim olsem bia em i wanpela samting i wok long kamapim planti ol pait na trabel long ples bilong em.

"Mi stap long ples na mi ting olsem ol ples lain tasol i save dring bia na kirapim pait na trabel na mi kam long Mosbi na mi lukim olsem wankain samting i kamap long siti.

"Mi go Hagen na mi lukim bia i wok long kamapim planti hevi,"Mista Kongo i tok.

Em i tok insait long Lagaip-Porgera distrik tasol, planti manmeri i wok long dring bia yet maski bia i tambu long dispela ples.

"Bia i tambu tru insait long Lagaip-Porgera distrik tasol ol man i wok long mekim ol liklik los o ges haus na salim bia.

"Ol i giaman na kirapim ol liklik ges haus long giamanim provinsal gavman na kisim lika laisens o tok orait long salim bia,"Mista Kongo i tok.

Em i tok bia i wok long kamapim planti nogut samting insait long Lagaip-Porgera distrik, Enga Provins na long olgeta ples long PNG.

"Gavman mas stopim bia. Pasim olgeta bia fektori insait long kantri bilong yumi,"Mista Kongo i tok.

## Powes traim kaikai

GAVANA bilong Nesenel Kapitel Distrik, Powes Parkop i traim kaikai bilong ol meri long infomol sekta long Gerehu na Godons maket husat i pinisim wanpela wik trening kos. Dispela trening i kamap aninit long Seif Siti Program we UN Wimen na NCDC i wok bung long en long kamapim seif na helti maket. Moa stori long Pes 11. Poto: Nicky Bernard



# Thank you **BSP!**

"BSP Home Loan helped us to purchase our first house. Our son now has his own room. We have our own kitchen and a whole yard to host a family Kaikai."

David Jonah  
First Home Buyer



A range of home loan products for first home buyers and existing home owners.

 FIRST HOME OWNERSHIP	 HOME LOAN
1. Maximum Loan K400,000	1. Flexible Loan Amount
2. Interest Rate 4% pa	2. Interest Rate 8.45% pa
3. Maximum Term 40 years	3. Maximum Term 25 years
4. Equity 10%	4. Equity 30%



320 1212 / 7030 1212 - 24/7  
servicebsp@bsp.com.pg  
www.bsp.com.pg





# Kuman i givim tok lukaut long ol opisa na kontrakta

**MEMBA** bilong Gumine, Nick Kuman, i givim tok lukaut long ol kontrakta na ol opisa na ol kontrakta long mekim gut sevis projek na ol pipel bai kisim sevis na no ken yusim nating mani.

'Sapos ol kontrakta na ol opisa i no yusim na menesim mani gut na bagarapim wok bilong ol bai ol polis i bihainim ol tu,' Minista Kuman i tok.

Dispela toktok em i mekim long taim bilong opim wok bilong Gumine- Nondri rot long Dinikul long baksait bilong Gumine distrik.

Em i tok, taim Distrik Developmen Atoriti i givim ol kontrak na husat i kisim wok i mas save olsem dispela em mani bilong gavman long yusim na pinisim dispela projek.

'Gavman bai i kam bek yet long lukim olsem ol i kamapim projek o

nogat. I no gat fri mani long wanem husat i kisim dispela kontrak i mas kamapim wok projek na gat ol ripot long soim,' Minista Kuman i tok.

Minista Kuman i toktok strong long ol memba bilong DDA na ilektoral opisa long no ken askim mani long ol kontrakta tok promis long ol long ol kontrak.

'Dispela i no inap kamap aninit long lidasip bilong mi.

Mi no save holim mani bilong Distrik o Ministri bilong Edukesen. Mi save yusim mani bilong mi yet long helpim mi yet,' Kuman i tok.

Em i tokim ol pipel olsem sapos wanpela memba bilong DDA na ilektoral opisa i askim mani long ol kontrakta husat i wok long rot o ol narapela projek long distrik, ripotim ol long polis o tokim em.

Minista Kuman i tok, 'Mi no save

bilip long ol pipel i save giaman long ol narapela.

Mani i save kamap long hatpela rot.

Sevis i mas kamap pastaim bihain yumi amamas,.

Em i tok long dispela bikos 2013 na 2014 projek i no kamap gut. Em i holim mani bilong 2015, olsem K21 milien bai em rausim.

## Woksop bilong ol pipel i stopim korapsen

OL pipel long Bogia distrik long Madang provins i ken luksave nau long wanem samting em korapsen na ol rot long abrusim korapsen.

Dispela i kamap klia taim ol i kamapim Bogia Komyuniti Koalisen Egens Korapsen long Korapsen Faitas Woksop long las mun.

Olsem 36 pipel i stap insait long dispela wok-

sop olsem 12-pela meri na 24 man i save gut long wanem em korapsen na i luksave gut olsem ol i gat bikpela wok long daunim pasin nogut.

Planti bilong ol pipel i stap insait long dispela em ol memba bilong kain kain Komyuniti Bes Ogenaisesen (CBO) long olgeta 6-pela distrik.

Trensperensi Intansional PNG (TIPNG) i

ogenaisim dispela woksop i givim ol pipel i stap insait ol samting na tingting long wok bung wantaim ol komyuniti long mekim wok tru na kamap gutpela pipel.

Planti bilong ol pipel i tok dispela woksop i givim strong long ol long save gut long ol sosial akauntabiliti, developim ol kain kain rot long mekim awenes, save gut long ol hevi,

kisim sapot bilong ol pablik na toktok long ol dispela hevi, wok wantaim midia, na kamap wantaim wanpela plen bilong toktok.

Ol i lukluk long wanem samting em korapsen, kain kain ol korapsen ektiviti, ol stail bilong korapsen long PNG na skoa bilong kantri long Korapsen Pesepsen Indeks, we i mekim ol isi long bungim developmen i go long korapsen.

## Memba bilong Gumine i laikim rot bai pinis



Mista Nick Kuman i opim ol wok bilong rot.

MINISTA bilong edukesen na memba bilong Gumine Nick Kuman, i laikim Dipatmen bilong Works long givim bek K4 milien long distrik long pinisim tupela rot projek long taim dispela yia i pinis.

'Sapos sampela mani long K4 milien i kam bipo long akaun bilong gavman i pas, mipela i ken gat wanpela seremoni bilong brukim graun bilong Gumine-Wara Sua na Dirima-Gomgale rot projek long dispela yia,' Mista Kuman i tok.

Mista Kuman i tok olsem K4 milien ol i

givim long Dipatmen bilong Woks long yusim long tupela rot projek tasol ol i no yusim gut ol mani long 2014.

'Mi pait strong long tupela yia long kisim dispela mani bek. Em i wanpela nogut menesmen long Dipatmen bilong Woks.

Em i stap long kes hap long Tras Akaun we Dipatmen i paulim dispela mani na yusim. Dipatmen i no bekim dispela mani yet long wanem dispela tupela rot projek i stap yet,' Mista Kuman i tok.

Em i tok dispela tupela

rot projek em i impoten rot i bungim boda bilong Karamui Distrik.

Mista Kuman i tok ol i putim mani insait long ol dispela rot olsem Gumine-Nondri rot, Yani i go long Omdara na Pildimna na Gaima, na Krukul bris i bungim Whagi rot.

'Gavana bilong Simbutu i givim mani long Genabona i go long Oonule rot.

Dispela ol bikpela rot we mipela i mas luksave olsem ol rot i gutpela bilong ol gavman sevis i go long helpim ol pipel,' Minista Kuman i tok.

## Malaguna Teknikel skul i kisim K50 000 long TVET

MALAGUNA Teknikel skul long Is Nu Briten provins (ENBP) bai i kisim K50, 000 long Teknikel Vokesenel Edukesen Trening (TVET) mani long Gavana bilong Nesenel Kapitel Distrik (NCD), Powes Parkop.

Gavana Parkop i kamap ges spika long Malaguna Teknikel skul long 21 gret 10 na namba 4 gret 12 greduesen long las wik Fonde.

'Mi laikim yupela ol sumatin, papamama na ol pipel long save olsem dispela provins i bin stap namel long kantri bilong

mipela. Taim i bin nogat taun, siti na ikonomi long PNG mipela i bin gat Rabaul,' Gavana Parkop i tok.

Em i tokim ol pipel long Is Nu Briten provins long amamas long ol wok ol i bin mekim long kamapim kantri. Gavana i amamas long ol long lidasip wok ol i bin mekim.

Gavana Parkop i tok ol pipel long Is Nu Briten i bin kamap lida long sait bilong politik na ol narapela wok tu. Em i tok salens i stap long ol dispela jeneresen na narapela bai i kam.

'Yumi i save long dispela histori tasol yumi mas tingim bikos tingim bai i mekim yumi gat gutpela sindaun long bihain,' Gavana Parkop i tok.

Em i salensim ol sumatin i pinisim skul long lainim na save long provinsal histori bilong ol.

'Olsem neks jeneresen bilong ol yangpela pipel bilong ENB yu i ken amamas na kirapim gen dispela spirit we i bin kamapim dispela kantri,' Gavana Parkop i tok.



### Word Publishing Company Ltd

P. O. Box 1962, Boroko, NCD 111, PNG. Tel: (675) 325 2500 Fax: (675) 325 2579  
Email: seovo@wantok.com.pg / word@wantok.com.pg

### Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)  
PNG K220.00, Aus:ralia/New Zealand US\$ 10.00, Asia/Pacific US\$150.00  
Rest of the World US\$210.00

NCD HOME DELIVERY  
K0.80t per cppy or K65.00 for two or more copies & Office pickup K52.00 per year for a copy.

Please send me \_\_\_\_\_ copy/copies of WANTOK for one year.

I enclose Kina/USD \_\_\_\_\_ as full payment.

Name \_\_\_\_\_

Postal Address \_\_\_\_\_

City \_\_\_\_\_

State/Province \_\_\_\_\_

(abbreviation)

Country \_\_\_\_\_ Zip/Postal Code \_\_\_\_\_

Street Address \_\_\_\_\_

Telephone \_\_\_\_\_ Fax \_\_\_\_\_

Email \_\_\_\_\_

Signed \_\_\_\_\_ Date \_\_\_\_\_

Publisher of



**WANTOK**  
Niuspepa bilong Yumi ol PNG Street

**Today**  
Monthly English paper

# NID opis op long Kavieng

Ahimsa Kibikibi i raitim

**NESENEL Aidentifikesen Pro-  
jek opis i op nau insait long  
Kavieng bihainim bung long  
Fraide las wik.**

NID Projek dairekta Dickson Kiragi na ol narapela wokman i bin ap wantaim ol provinsal edministration wok manmeri na ol memba bilong pablik long witnesim opening bilong nupela opis.

Dispela ofps i op wantaim ol toktok I kam long ol go pas lain na bihain, ol namba wan lain i go na yusim sevis.

Deputi Provinsal edministreta, Lamiller Pawut, i bin wanpela long ol dispela lain na long toktok bilong en, em i bin amamas tru olsem Kavieng i gat kain hap nau i stap we kain wok ol i mekim bai nap helpim gut tru wok bilong Gavman bilong Nu Ailan.

Mista Pawut i tok Nu Ailan gavman i go pas long kain kain projek olsem ol lapun na disebel pensen, edukesen na ol narapela we i nidim namba tru tru long ranim gut ol kain program.



Bos bilong NID projek, Dickson Kiragi i prisenim Deputi P.A bilong Nu Ailan Lamiller Pawut, wantaim setifiket bilong em.

## Ol pastaim paitman long Siwai Distrik i sekan

Eleanor Maineke i raitim

OL pastaim BRA bilong Motuna, Huyono na Tokunutu i holim han wantaim ol pastaim resistens bilong Kopi na Ramu Konstituensi insait long Siwai distrik long dei namba 21 insait long dispela mun.

Dispela i bin kamap long Rabaulu Praimeri Skul long Siwai yet. Dispela mak em ol i

save kolim Irimakoto long tokples Siwai.

Em i pasin kastom we i soim olsem tupela sait nau i givim bel long wanpela narapela na bai ol i wok bung wantaim long bikpela seremoni bai i kamap long neks mun.

Dispela seremoni em ol i kolim "singsingketu" long tokples Siwai o em i tokaut na trautim ol samting namel long ol viktim na ol lain i

kamapim hevi hevi insait long Siwai Kraisis.

Dispela wok em i kamap ananit long lukaut bilong Siwai Distrik Pis na Sekyuriti Komiti na Midiesen Tim bilong em.

Siwai Distrik Pis na Sekyuriti Komiti i bin kirap long yia 2014 na dispela Siwai Kraisis ol i bin lukim olsem wanpela keis we ol i mas stretim pastaim. Na ol i wok long bihainim pasin

kastom long stretim ol hevi i bin brukim ol pipel bilong Siwai.

Insait long dispela Irimakoto Seremoni-ABG Minista bilong Fainens na Treseri na Memba bilong Motuna/Huyono/Tokunutu i bin stap na witnesim.

Seremoni i bin kamap gut wantaim pasin kastom bilong kaikai buai na planim ston olsem mak bilong wanbel pasin.



: Ol tupela lain paitman long Siwai i sekan na bung wantaim.

## Mak bilong literesi i save kamapim save

Esther Bralyn Wani i raitim

**PAPUA Niugini Edukesen Edvokesi Netwok (PEAN) i holim bung long Trinde las wik i toktok planti long literesi mak bilong PNG.**

Ol sampela non-gavman ogenaimesen i bung na toktok long mak bilong literesi long PNG we i pundaun na dispela i daunim save bilong ol pipel.

Suprintenden Komanding Opisa bilong Koreksenel Sevis long Bomana, Haraha Keko i tok, 'Mi save guria taim

ol kalabus man i save long rit na rait taim mi givim ol sampela fom long pulumapim.'

Mista Keko i tok dispela i soim olsem sampela ol kalabus i no inap harim gut toktok bilong ol loya bilong ol na paul tu insait long kot we ol i ken kalabusim ol nating.

'Mipela i nidim sapot bilong gavman long dispela literesi program na kamapim gut mak bilong literesi. Edukesen em i namba wan samting long developim na mipela i mas developim olgeta pipel long redi long ol narapela yia.

Long wankain taim,

wanpela longtaim tisa, Mesia Nouau, i tok, 'literesi em i namba wan samting. Em bai kamapim gut o nogat ol wok go het long kantri bilong yumi.

'literesi i no wankain olsem 1950s na 70s, literesi bilong tude i pundaun na dispela i soim olsem long 56 pesen save bilong PNG, 1 pesen i pundaun,' Mista Nouau i tok.

Mista Nouau i tok literesi em i no long save long rit na rait tasol. Em i tok literesi em i save, sapos yumi save long rit na rait bai yumi gat planti save.

## Sekan long Wakunai Distrik



Antoinne em i survivor na 4-pela poro bilong em i lusim laip na ol bun bilong ol i lus yet.

Eleanor Maineke i raitim

DISPELA mun i lukim ol rikonsiliesen seremoni o sekan pasin i kamap insait long Bogenvil.

Long las Trinde, Novemba 18, i bin igat wanpela bikpela rikonsiliesen seremoni i bin kamap long Mabiri Boys Hai Skul Soka Oval.

Dispela sekan em i bin kamap namel long ol pipel bilong Bareka na Tarara.

Long taim bilong Bogenvil pait, hevi i bin kamap namel long dispela tupela ples na 4-pela yangpela bilong Bareka komyuniti i bin lusim laip bilong ol na wanpela tasol i no bin dai.

Dispela ol 4-pela man i stap yet olsem ol

"missing persons" o i lus yet.

OL famili na ol hauslain bilong ol i painim ol yet na ol bun bilong ol na i hop na prei olsem wan dei bai ol i ken painim ol bun bilong ol.

Dispela sekan i bin kamap bihainim yet wok midiesen ol midieta bilong Wakunai Distrik Pis na Sekyuriti Komiti i go pas long em.

Wakunai Distrik Pis na Sekyuriti Komiti i save kisim fanding o mani bilong go hetim ol wok long kamapim sekan pasin insait long distrik long Bogenvil Pis Bilding Program or BPPB.

Dispela sekan i bin lukim moa olsem 450 man meri na pikinini kam bung na witnesim seremoni.

Memba i makim Diptamen bilong Maining

insait long ABG na memba bilong Rau Konstituensi, Robin Wilson, i bin stap tu long dispela taim.

Long toktok bilong en, em i bin singaut long ol pipoeilong Bogenvil long wok strong na stretim ol hevi bilong kraisis.

Em i bin tok "taim yu pogiv, yu mas kisim dispela risponsibiliti o wok long go hetim gutpela wok".

Em i hatpela pasin tru long pogivim narapela tasol yumi mas wok strong long helpim ol narapela long luksave long gutpela rot.

Narapela tripela famili i no bin redi long sekan wantaim ol Tarara lain long dispela taim olsem, na tupela famili tasol i bin sekan wantaim ol pipel bilong Tarara.



# Komisina Baki i toktok long gutpela pasin long gutpela pasin



Polis Komisina Baki i tokim ol nupela rikrut long disiplin na wok aninit long koman.

**KOMISINA bilong Polis, Gari Baki, i toktok long self- disiplin o bihainim gutpela pasin na i tok olsem gutpela pasin i ki bilong olgeta samting.**

Baki i mekim dispela toktok long las wik Tunde long Bomana Polis Kolis long Pot Mosbi taim em i

toktok wantaim ol nupela 286 polis rikrut.

"Polis fos em i wanpela olpela ogenaissen long Papua Niugini we em i save karim aut disiplin, tasol ol senia opisa na ol non- komisin opisa (NCO) i no karim aut dispela wok disiplin olsem, ol memba i save skulim

ol long Bomana Polis Kolis," Baki i tok.

"Wok polis em i no liklik wok, nogat. Em i wanpela narapela kain wok," Baki i tokim ol nupela rikrut.

"Wok aninit long lo em nau i stap long han bilong wan wan opisa long kisim trening na disiplin we ol wok poro bai gat

long rispektim wanpela na narapela long strongim wok i go het.

"Dispela 286 nupela rikrut em i bikpela namba we polis kolis i kisim inap long 5-pela yia."

Baki i salensim ol rikrut na i tok, "Mi laik lukim dispela 286 i mas pas aut long Mei, long yia i kam, 2016."

## AFP i bekim toktok long ol media ripot

AUSTRALIAN Federal Polis (AFP) i bekim toktok bilong ol media ripot ol i mekim long Novemba 23, long ol wok ol polis i mekim long Papua Niugini.

Ol i ripot olsem, "AFP i harim ol sampela toktok we ol memba bilong AFP i mekim we ol i gat bikpela wari long dispela."

"Long olgeta taim, AFP i save harim ol toktok we ol memba bilong em (AFP) i save mekim long strongim na karimaut wok bilong narapela kantri.

"AFP i no bin kisim wanpela opisal ripot long ol wok lain bilong em long PNG olsem Royal Papua Niugini Konstabuleri (RPNGC) i save stap wantaim long ol i save sotim laip bilong ol man, nogat. Tasol, AFP i save harim ol dispela kain toktok long sosel media na jenerel media.

"Na tu, em i save harim olsem pablik manmeri na ol media outlet i save toktok long ol dispela kain karangi wokabaut bi-

long RPNGC," Ripot i kam long AFP opis.

AFP i kisim bikpela toktok wantaim wanpela wok lain long mun Julai na Septemba long sampela hevi, taim ol i kam wok long PNG long yia 2013 inap 2014.

AFP i lukluk long dispela toktok, tasol em i no painimaut sampela hevi bilong AFP long lukluk moa long dispela.

Ol hap bilong wok long PNG em i hat tumas na wok bilong AFP i save gat bikpela salens. Tasol, AFP i save go pas na i save toktok gut wantaim ol polis na ol eksekutiv bilong RPNGC olsem em i strongpela rot long strongim humen rait na akauntabiliti long PNG polis.

Wanpela bikpela samting long toktok em olsem, AFP i no gat wanpela lo bilong karimaut ol wok painimaut long PNG. Ol memba bilong AFP save i gat yunifom, tasol PNG-Australia Polis Patnasip (APP) i save mekim ol wok aninit

long tok orait bilong ol bik lain na i no save mekim ol wok long laik bilong ol.

Lukluk bilong APP long PNG em bilong kosing, mentoring na influencing ol polis wok ol i save mekim long RPNGC aninit long rul bilong lo.

Ol wok lain bilong AFP husat i stap long PNG i no inap long harim ol toktok long ol wok karangi bilong humen rait na raskol pasin. Dispela kain pasin bai no inap long kamap bikos i gat ol rul na gaidlain i stap bilong lukautim dispela karangi wokabaut na ripotim long ol senia AFP Menesmen.

AFP i toktok yet wantaim ol senia eksekutiv bilong RPNGC, na em i kamap wantaim sampela rot bilong senis na impruvmen long sapotim developmen bilong akauntabiliti na profesenel polis sevis.

AFP i stap long PNG inap long tupela yia na i mekim sampela planti gutpela senis i kamap long RPNGC.

## Komisina tok ol ripot i no tru

KOMISINA bilong polis, Gary Baki i tok wanpela Australia media ripot i tok Papua Niugini polis i rausim ol pipel na haus long Butibam, Morobe provins na kilim planti pipel em rabis na ol giman toktok.

'Em i no gutpela wok bilong jenelis. Australia media ogenaissen i no mekim gut wok bilong ol long pablisim kain ol ripot na i no painim gut as bilong toktok na sekap wantaim mi, o Momase Divisonal Koman, Morobe Polis Koman o Lae Metropolitan Koman.

'Mi ritim ol dispela toktok we Australia media i raitim na mi wari long ol. Em ol giman toktok tru. Mi save olsem Australia Federal Polis (AFP) Mision Komanda long PNG i wari tu long ol dispela

giman toktok. No gat wanpela kain hevi i bin kamap long Butibam viles. I no gat rekot bilong en i bin kamap na

nogat wanpela i bin kamap, Australia media ripota na Australia media ogenaissen i gat long PNG.

Long dispela, Komisina i tok, 'Mi save i gat planti ol salens polis i lukim long wok bilong ol long PNG. Olsem Komisina mi i no inap haitim wanpela samting.

Ol polis i save paitim ol pipel nating, ol polis i save brukim lo na ol polis man na meri i save mekim nogut pasin bai mipela i sasim ol na kalabusim ol.

Sapos ol polis i no harim tok, na ol i bikhet bai mipela i rausim ol.'

Em i tok i gat ol polis i save mekim wok gut long givim sevis bilong polis long ol pipel. Long wankain taim, Komisina i stap long Buka long bungim olgeta senia polis opisa long lukluk long ol rot bilong helpim 8 milien pipel.

# HUGE SAVINGS

## this CHRISTMAS

**32" FULL HIGH DEFINITION**

**StarVision DLED TV**  
USB PLAYBACK, HDMI, PC INPUT  
239562

**HOT PRICE**

**K995**  
SAVE K1,169  
PAY FORTNIGHTLY @ \*95 FOR 13 FORTNIGHTS

**TRAMONTINA VENTURA 4PC COOKWARE SET**  
STAINLESS STEEL 249345

**HOT PRICE**

**K379**  
SAVE K70  
PAY FORTNIGHTLY @ \*40 FOR 13 FORTNIGHTS

**Coleman CLASSIC LANTERN**  
4x D BATTERIES  
CPX 6 COMPATIBLE  
241034

**HOT PRICE**

**K50**  
SAVE K75

**GRAB A COPY OF THE BRIAN BELL CHRISTMAS CATALOGUE FROM YOUR NEAREST BRIAN BELL BRANCH FOR MORE HOT DEALS & GREAT GIFT IDEAS. SHOP TO WIN! CHRISTMAS GIVEAWAY NOW ON!**

<b>Brian Bell Group</b>		<b>PORT MORESBY</b>	<b>LAE</b>
	<b>Home Centre</b>	325 8469 Malekula	472 3377
	<b>Boroko Plaza</b>	325 5411 Aircorps Road	472 3200
	<b>MADANG</b>	422 1899 KOKOPO	982 9027
	<b>GOROKA</b>	532 1622 MT HAGEN	542 1999
	Wholesale • Retail • Everything for your Home	Email: <a href="mailto:bbsales@brianbell.com.pg">bbsales@brianbell.com.pg</a>	



# Mak bilong literesi i save kamapim save

Esther Bralyn Wani  
i raitim

PAPUA Niugini Edukesen Edvokasi Netwok (PEAN) i holim bung long Trinde las wik i toktok planti long literesi mak bilong PNG.

naisesen i bung na toktok long mak bilong literesi long PNG we i pundaun na dispela i daunim save bilong ol pipel.

Suprintenden Komanding Opisa bilong Koreksenel Sevis long Bomanana, Haraha Keko i tok, 'Mi save guria taim ol kalabus man i save long rit na rait taim mi givim ol sampela fom long pulumapim.'

Mista Keko i tok dispela i soim olsem sampela ol kalabus i no inap harim gut toktok bilong ol loya bilong ol na paul tu insait long kot we ol i ken kalabusim ol nating.

'Mipela i nidim sapot bilong gavman long dispela literesi program na kamapim gut mak bilong literesi. Edukesen em i namba wan samting long developim na mipela i mas

developim olgeta pipel long redi long ol narapela yia.

Long wankain taim, wampela longtaim tisa, Mesia Nouau, i tok, 'literesi em i namba wan samting. Em bai kamapim gut o nogat ol wok go het long kantri bilong yumi.

'literesi i no wankain olsem 1950s na 70s, literesi bilong tude i

pundaun na dispela i soim olsem long 56 pesen save bilong PNG, 1 pesen i pundaun,' Mista Nouau i tok.

Mista Nouau i tok literesi em i no long save long rit na rait tasol. Em i tok literesi em i save, sapos yumi save long rit na rait bai yumi gat planti save.

## BSP i opim Go Grin klinaton long Bavaroko Praimeri



Ol pikinini long Bavaroko Praimeri i redi wantaim ol beg we BSP i givim ol long klinim skul. *BSP Midia*

Esther Bralyn Wani  
i raitim

BAVAROKO Praimeri i kamap namba wan skul long opim Benk Saut Pasifik (BSP) Go Grin klinaton long Pot Mosbi we ol sumatin i stat klinim skul bilong ol.

Ambaseda bilong BSP, Ryan Pini, i opim dispela klinaton long Bavaroko Praimeri skul.

Kopret Iven Kodineta bilong BSP, Amelia Minnopu, i tok Bavaroko i wampela bilong ol 22 skul i rejista long BSP klinaton we BSP i mekim olgeta wampela yia.

Het tisa bilong Bavaroko Praimeri, Catherine Moresi i tok, 'Mipela i laik tok tenkyu long BSP long makim Bavaroko long dispela yia. 'Mi amamas long tok

olsem em i rutin bilong skul long klinim skul tupela taim long wampela de na dispela BSP Go Grin klinaton bai i go het,' Misis Moresi i tok.

Long wankain taim, Siaman bilong skul, Pastor Turi Minimoa i tok, 'God i givim yumi dispela wok long klinim envairomen long dispela em i wok bilong ol sumatin, na ol pipel long wokim.

Ryan Pini i pasim toktok wantaim nogut bilong plastik i save kamapim long envairomen. Em i tok plestik i save stap longpela taim na em i save bagarapim envairomen.

Mista Pini i tokim ol sumatin olsem em i save karim beg bilong em yet taim em laik go long stua. Em i tok dispela bai daunim ol planti plestik yumi save yusim.

## Intanesenel de bilong rausim vailens egensim ol meri

VAILENS egens ol meri i wampela bikpela samting we ol i save brukim human raits. Long Papua Niugini, vailens egens ol meri i bikpela long ol haus na ol komyuniti, na i save kisim bagarap long han bilong ol lain i save wok long lukautim ol meri na ol liklik meri. Famili na seksual vailens, reip, ol dai i kamap long sutim tok long sanguma, na diskriminisen egensim ol meri em i wampela bikpela hevi long kantri.

Long dispela yia, 16 de bilong ektivisim egensim jenda bes vailens bai i go het long opim wampela yia kempen long mekim awenes bilong ol rait na

fridom. Novemba 25 i gat bikpela luksave olsem Intanesenel De bilong Rausim Vailens egens ol meri. Dispela de em i statim '16 de bilong ektivisim egensim Jenda bes Vailens.

Long PNG, ektivisim long stopim vailens egensim ol meri na ol liklik meri i save gat plen olsem '20 de', we em wampela sans long givim maus long husat i kisim bikpela bagarap, serim ol ekspiriens bilong ol, na kisim wan wan na ol komyuniti long mekim sampela samting long egensim pasin bilong brukim human raits.

It's time to fly with your NEW Airline



People connecting People.

We can assure you that we'll stay true to our promise, that you'll receive the warmest welcome everytime with PNG Air.



PNG Air

Reservations Phone: 7222 2151 • Toll Free Call: 16111 • Online Reservations: [www.pngair.com.pg](http://www.pngair.com.pg)



# I no gat inap wara na senitesen long Pasifik - Wol benk ripot i tok

**WANPELA** nupela ripot bilong Wol Benk i tokaut long Wol De bilong Toilet, Novemba 16, olsem planti famili long ol Pasifik kantri i no gat inap wara na toilet.

Ripot i tok olsem namba bilong famili i go bikpela insait long ol siti bilong Pasifik, tasol mak bilong wara na senitesen na helt bilong ol pipel i no kamap gut long ol setelmen olsem na ol siti atoriti i mas hariap long stretim.

Ripot i soim long wanem as

planti tausen famili long ol Melanesia kantri olsem Solomon Ailan, Fiji, Vanuatu na Papua Niugini i no inap long kisim gutpela wara na toilet insait long ol eben setelmen komyuniti.

Ripot i givim sampela rekomendesen long wanem kain wei bai gavman wantaim ol lain i save bringim ol dispela kain sevis na ol NGO marimari ogenaísesen wantaim ol dona, inap long wok bung long kamapim gut ol

senitesen we ol famili inap long spendim liklik mani tasol long yusim.

“Wok painimaut insait long dispela ripot em i bringim planti tingting, taim em i soim trupela piksa bilong ol planti famili husat i stap long ol skwata setelmen long ol bikpela siti na i no gat gutpela, klin na seif wara long dring, na tu i no gat gutpela septik toilet i gat wara bilong wasim han,” Franz Dress-Gross, Wol Benk Dairekta bi-

long Papua Niugini, Timor-Leste na Pasifik i tok.

“Mipela i hop olsem dispela ripot bai kirapim ol toktok long Pasifik, bikos ol skwata setelemen nau i kamap wanpela bikpela komyuniti bilong ol bikpela siti olsem Pot Mosbi, Honiara, Suva na Pot Vila.

Em i gutpela long ol lain i mekim disisen bai wok bung wantaim insait long rijon long brukim daun planti banis i pasim ol pipel long kisim ol

dispela besik sevis.” Mista Dress-Gross i tok.

Insait long ol dispela 4-pela kapital siti bilong Melanesia, inap long 45 pesen bilong ol populesen i save stap long ol skwata setelmen. Ol i stap long ol haus we ol i no wokim gut na i stap long ol graun we i no gat len taitel o i stap long hap we ren na wara tait inap long

bagarapim, na tu, ol i stap antap long sait bilong maunten o long ol hap we i stap klostu, klostu tumas.

Taim moa pipel i go long stap long ol kapital siti, na ol plen bilong ol haus na infrastraksa i stap wankain yet olsem bipo, dispela namba bilong ol pipel inap long go antap long 65 pesen long taim yumi kisim yia 2023.

**EVERY HERO NEEDS A MAMA FLAME**

Mothers know it all starts with a full stomach.  
That's what gives their families the Strength & Energy to win.

**Flame**  
STRENGTH & ENERGY

**Flame**  
Plain Flour  
Strength & Energy 1kg

## Planti setelmen i mas gat nupela plen bilong siti

NAMBA bilong ol setelmen i go bikpela na i kamapim moa hevi bilong helt na sindaun taim i no gat gutpela wara saplai, senitesen na haijin sevis. Dispela i kamap ol sik olsem kolera na pekpek wara, na i opim dua long planti meri na pikinini long kisim sik, na tu, ol famili i no gat ples bilong ol i stap haitim ol yet na bagarapim gutpela nem bilong ol.

Dispela toktok i kamap insait long nupela Wol Benk ripot long dispela mun. Nem bilong dispela ripot em “Unsettled: water and sanitation in urban settlement communities of the Pacific.” Yunaitet Nesens Hebitet, UNICEF na Pasifik Rijonal Infrastraksa Fasiliti i kamapim dispela ripot.

“Taim i no gat inap toilet, ol pipel bai yusim ol toilet we i op nating long ol lang na tait wara na we ol pikinini na ol lapun bai i no inap long yusim,” Isabel Blackett, Senia Wara na Senitesen Speselis bilong Wol Benk i tok.

“We i no gat wara tep klostu long ol haus, ol meri na pikinini bai karim ol wara kontena i go long wara na inap kamapim ol hevi long helt bilong ol,” Blackett i tok.

Ripot i tok olsem we i no gat gutpela wara na senitesen i soim olsem gavman na ol lain bilong bringim gutpela na seif wara i no mekim wok bilong ol. Hevi bilong graun tu i mekim na ol gutpela wei bilong toilet i no inap long kamap long ol setelmen. Em i hatwok long ol gavman i putim ol wara na sentitesen sevis we ol pipel inap long baim na yusim bikos gavman i pret long ol setelmen i kamap bikpela moa.

“Tingting bilong gavman long kamapim wara na senitesen sevis i mas senis nau. Sapos no gat bai ol hevi bilong sik na bagarap namel long ol meri na pikinini i kamap bikpela na em inap long kamapim ol sik i save kam long ol doti wara na kamapim distasta long ol Pasifik kantri,” Mis Blackett i tok.

“Mipela i lukim bikpela eksampel bilong ol eksen long ol sampela hap bilong Honiara na Suva, we i soim olsem ol inap long mekim ol wok we bai helpim ol lain i stap long ol setelemen na gavman na ol narapela lain husat i bringim sevis long ol pipel,” em i tok.

## NACS i no gat mani bilong Wol AIDS De

TUNDE Desember 1, i makim Wol HIV na AIDS de. Olgeta yia ol kantri long wol i save luksave long dispela de, wankain tu long Papua Niugini.

Hia long kantri em Nesanel AIDS Kaunsil Seketeriet (NACS) i save go pas long ogenaísesim ol selebresen na de bilong luksave long dispela bikpela hevi. Tasol long dispela yia, Nesanel AIDS Kaunsil Seketeriet i stap isi stret, i no gat bikpela toktok long midia bikos ol i no gat inap mani long mekim ol dispela kain awenes na edvokasi.

Ol i no gat mani long kamapim ol IEC matiriel, em ol pepa na piksa bilong givim moa tok save long ol pablik long dispela taim. Tasol ol woklain i gat olpela tok save pepa i stap we ol bai potokopi na givimaut long pablik. Tasol long wokim ol kain samting olsem drama, pilai na ol flot em bai i no gat mani.



# Ol meri i pinisim skul long kuk

Esther Bralyn Wani  
i raitim

“MI laik askim ol pipel long infomal sekta long helpim mi long lukautim siti na mekim klin na seif we bai kamap responsabiliti bilong yupela. Ol meri i go long stua na maket i no ken pilim pret,” Gavana bilong Nesenel Kapitel Distrik (NCD) i tok long greduesen bilong ol meri long Tunde.

Ol meri long Gordon na Gerehu maket i kisim dispela wan wik trening wantaim Gouno Grass-Roots Catering Service long kukim kaikai na salim ol kaikai long maket. Dispela i kamap insait long Seif Siti Program bilong NCD.

Gavana Parkop i salensim ol meri long gat bikipela plen long bihain tu long lusim infomal i go fomal na kamapim wok bilong ol pikinini bilong ol long bihain.

“Mipela i laik bung wantaim ol pipel bilong siti na wantaim UN Wimen long wanem mipela i laik senisim ol maket bilong yumi i no bilong maket tasol bilong seif helti en-vauiromen,” Gavana Parkop i tok.

Long wankain taim, Ekt-



Ol meri i holim ol setifiket bilong ol i sanap wantaim Gavana bilong NCD, Powes Parkop, Ekting Siti Menesa, Honk Kiap, na sampela ol bikman.

ing Siti Menesa bilong NCDC, Hon Kiap i tok, ‘Planti kros pait i save kamap long ol maket bikos hap bilong maket i save sot long dispela bai i gat nupela maket we UN Wimen na NCDC i wok bung long kirapim.’

Mista Kiap i tokim ol meri long no ken yusim han bilong ol long bagarapim narapela meri. Taim ol i kuk, ol i mas kuk gut na stap klin olgeta taim.

Wanpela sumatin husat i

bin pinisim trening bilong em long wankain trening ol meri i kisim i serim ol ekspiriens bilong en long taim bilong greduesen.

Jones Iomarley i pinisim gret 9 na no gat wok bilong em na em i joinim dispela trening. Em i painim wok wantaim setifiket bilong em na em i wok gut tru na kisim promosen long wok bilong en.

Mista Iomarley i tok, ‘Mi lainim tripela samting long dispela trening we ol nara-

pela i no bin save na long dispela mi bin kisim promosen na pe bilong mi i bin go bikipela. Dispela tripela samting em, long klinim mi yet, stap helti na hap we mi save wok i save klin olgeta taim.

Ol 19 meri i greduet wantaim setifiket long kukim kaikai na salim, 12-pela bilong Gordons maket na 7-pela meri bilong Gerehu maket aninit long Seif Siti Program bilong NCDC.

# Ol meri i harim ol skul toktok

OL meri long Papua Niugini i gat sans long lukim wanpela bisnis meri bilong Yunaitet Stet bilong Amerika (USA) i givim sampela skul long ol.

Sif Eksekutiv Opisa bilong FACE Africa, Sara Kaba Jones, wanpela komyuniti developmen oge-naisesen i wok long strongim wara, senitesen, haijin (WASH) infrastraksa na ol sevis long ol rurel komyuniti long hap bilong Saharan Afrika.

Mis Jones i go pas long



Sif Eksekutiv Opisa bilong FACE Africa, Sara Kaba Jones.

ol woksop long dispela wik long toktok na strongim ol meri long ol rot bilong mekim bisnis.

Long Mande, em i toktok long ol rot bilong bilong mekim gut na ol bikipela samting long mekim bai kirapim bisnis bilong ol pipel.

Long Tunde, em i toktok long ol meri i gat bisnis na ol meri i go pas long nong-gavman oge-naisesen long abrusim ol hevi insait long menesim wanpela oge-naisesen.

Long asde, ol 19 meri

lida wantaim Mis Jones i raun i go long Pari viles we em i toktok long ol meri long yusim wara gut na ol meri i mas go pas long dispela.

Em i save toktok planti long ol het tok bilong wara na senitesen, bisnis na jenda ikwaliti.

Em i save toktok long ol bikipela hap olsem Wol Ikonmik Forum, Harvard yunivesiti, MIT, London Skul bilong Ikonmik, na Afrika Yunien.

# Madang i redi long opim PMIZ

PROVINSEL gavman, ol pipel na ol bisnis komyuniti long Madang provins i redi long kisim Prais Minista Peter O'Neill taim em i go long Mande long opim konstraksen wok bilong Pasifik Marin Industri Zon (PMIZ) projek.

Minista bilong Tred, Komes, na Industri, Richard Maru i tokaut long amamas bilong en long projek bai kamap nau inap longpela taim em i bin stap nating.

PMIZ projek i bin stap nating olsem 5-pela yia bikos long ol sampela pipel o komyuniti i kisim dispela hap i go long kot egensim gavman long bagarapim envauiromen.

Tasol ol pipel long komyuniti i rausim dispela kes na



Piksa i soim PMIZ projek long PNG.

Saina Eksim Benk i givim moa taim long dinau bilong PMIZ long wok bai i stat.

Prais Minista bai tokaut tu long sampela bikipela inisietiv

o plen, na ol polisi bilong gavman long dispela taim.

Dispela em long; stretim olgeta rot long Madang taun, bikipela lo na oda operesen

long Madang provins long daunim ol nem nogut i kamap long media, Madang bai kamap wanpela hap bilong ol turis wantaim Is Nu Briten na Milen Be provins, na ol bikipela polisi long sait bilong pis long kamap papa bilong putim pis long tin na ol kampani long kantri.

‘Prais Minista bai tokaut long kamapim nupela kampani we bai kamap papa bilong PMIZ projek na helpim olgeta sans bilong bisnis long projek,’ Minista Maru i tok.

Kumul Konsolidet Holding (gavman) na Madang provin-sel gavman i makim ol pipel bilong Madang na ol komyuniti i stap arere long PMIZ projek bai i kamap papa bilong dispela nupela kampani.



## Yut, Meri na Famili

Pastor  
Barbara Lunge

## Ol meri mas tanim bel na kisim kraun bilong win!

OLSEM wanem bai meri kamap fri long pasin bilong pait na bagarapim meri?

Ol meri i kamap namba wan tru long kisim hevi bilong pasin no gut olsem pait, bagarap long bodi, tok no gut, na long kisim bagarap long tingting. Namba wan meri long graun, Eve i bin wokim asua long kamapim pundaun bilong olgeta manmeri bikos long pasin bilong sakim tok bilong God.

Long pasin bilong em long sakim Lo bilong God, em i opim yau bilong em long harim toktok bilong snek taim em i giamanim em long kaikai prut we God i bin tambuim long kisim na kaikai. Long dispela as, sin, dai na hatwok, pen na pasin bilong giaman na planti narapela bagarap i kamap long yumi manmeri bilong graun. Bihain long seten i bin giamanim meri nau snek na meri tupela i kamap birua.

“Na bai mi mekim yu stap birua bilong meri, na meri i stap birua bilong yu. Na bai mi mekim ol lain bilong yu i birua long lain bilong meri. Bai ol i krungutim het bilong yu, na bai yu kaikaim lek bilong ol.” Stat 3:15-16.

I gat wanpela tok i stap pinis olsem God i putim birua namel long meri na seten na namel long meri na ol pikinini bilong em na tu ol pikinini bilong seten. Snek i kaikai lek bilong pikinini bilong meri na pikinini bilong meri bai krungutim het bilong snek. Bikos long sin pasin bilong Iv, yumi ol man bilong graun i kisim pasin bilong sin na bikhet. I gat planti rot mi laik toksave long ol meri i bihainim long ol inap long kisim bek atoriti na gutpela sindaun bilong ol bek.

Namba wan, yu mas stretim gen rilesensip bilong yu wantaim God na papa bilong yu olsem na yu bas tanim bel na kamap nupela gen insait long famili bilong em.

“...Tru tumas mi tokim yu, sapos man i no kamap nupela gen, em i no inap lukim kingdom bilong God,” Jon 3:3.

“Tasol sampela manmeri i kisim em, na ol lain i bilip long nem bilong em. Na em i givim namba long ol bai ol i ken kamap pikinini bilong God. Ol i no kamap pikinini bilong God long blut bilong papamama, o long laik bilong bodi, o long laik bilong man. Nogat. God yet i mekim ol i kamap pikinini bilong em.” Jon 1:12-13.

Taim yu kamap wanpela pikinini bilong God, bai yu kisim bek namba wan ples bilong yu na atoriti na pawa yu gat long bosim graun.

“Bihain God i tok olsem, ‘Nau yumi wokim ol manmeri bai ol i kamap olsem yumi yet. Bai yumi putim ol i stap bos bilong ol pis na ol pisin na bilong olgeta kain animal na bilong olgeta samting bilong graun. Orait God i wokim ol manmeri na ol i kamap olsem God yet’. God i mekim ol i kamap man na meri.” Stat 1:26-27.

“Stilman i no save kam bilong mekim narapela samting. Nogat. Em i kam bilong stilim ol sipsip na bilong kilim ol i dai na bagarapim ol. Tasol mi, mi kam bilong ol i ken kisim laip, na bilong laip i ken pulap tru long ol.” Jon 10:10

“Lo i bin kotim yumi na kamapim ol rong bilong yumi, na mekim yumi i stap aninit long ol tok na strong bilong en. Tasol God i bin rausim olgeta dispela tok bilong kotim yumi, na em i pinisim strong bilong lo na hangamapim em long diwai kros bilong Kraus. Em i pinisim strong bilong ol strongpela spirit na olgeta kain samting i gat strong. Long diwai kros God i soim olgeta man olsem em i winim pinis ol dispela samting na i mekim ol i kamap olsem samting nating.” Kolosi 2:14-15.

Tude yu singaut long nem bilong Bikipela na bai em i kisim bek yu. God husait i pulap long pasin bilong marimari bai kisim yu bek na senisim yu long kamap wankain olsem em yet. Rom 10:13

“Olsem na yupela i mas daunim yupela yet na i stap aninit long God. Yupela i mas sakim Satan, na em bai i lusim yupela na ranawe. Yupela i mas i go klostu tru long God, na em bai i kam klostu tru long yupela. Yupela man bilong sin, bel bilong yupela i mas kamap klin, olsem man i wasim han bilong em na i kamap klin. Yupela man i gat tupela tingting, yupela i mas rausim dispela tingting nogut long bel bilong yupela.” Jems 4:7-8.

**Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com**





**GLASIM  
TOK**  
wantaim  
Fr Lollington Wiam

## Seim seks na pamuk namba tri hap

Mi laik skruim yet long namba tri hap we mi painim hat tru long painim wanem hap Baibel long Olpela Testamen o Nupela Testamen i stori long man i ken maritim man na meri i ken maritim meri. Tru, long pasin pamuk, yes, em i gat long Buk Tambu long Olpela na Nupela testamen. Tasol pasin pamuk, em i stap pinis long Olpela na Nupela testamen. Olsem stori bilong Sodom na Gomora, long Genesis sapta 19 Sodom i mekim pasin nogut na God i salim tupela angelo i kam long bagarapim Sodom na Gomora. Taim Lot i sindaun i stap long ples bung long bikpela dua bilong Sodom tupela angelo i kam na bungim Lot na em i kisim ol i go long haus bilong em na i kukim kaikai na givim ol long kaikai.

Long ves 4 tupela i no slip yet, na ol man bilong Sodom i kam banisim haus ol i stap long en. Olgeta man long taun i kam, ol yangpela wantaim ol lapun na ol i singaut long Lot olsem, "We stap dispela tupela man i slip long haus bilong yu? Salim tupela i kam autsai na bai mipela i ken slip wantaim tupela."

Dispela rot em i bikpela pasin pekato tru long ai bilong God na dispela pekato i karamapim Sodom na Gomora. Lukim taim God i salim tupela wokman bilong em long bagarapim Sodom, olgeta ol lapun na yangpela man long Sodom i pulim lain long kam na laik wokim pasin nogut long tupela wokman bilong God Papa.

Dispela em pasin bilong enimal stret na long dispela pasin nogut tasol, God i salim hatpela ston bilong paia nogut i kam daun na kukim tupela bik taun Sodom na Gomora na olgeta samting i stap insait long en na ol diwai tu. Em long pasin pamuk na pasin bilong wokim pasim nogut wantaim narapela man o meri. Tasol God i lukim oda bilong lo bilong marit i no go stret olsem na em i bagarapim Sodom na Gomora.

Long Gen 19. 30-38 Lot i pret long stap long taun Soar na em i kisim tupela pikinini meri bilong em na go i stap antap long ples maunten long wanpela hul bilong ston. Sapos yumi glasim gut, tupela pikinini meri i painim hat tru long kamapim pikinini. Tupela inap long marit long ol yet na kamapim narapela laip tasol i no inap, long wanem, tupela i meri na nogat man. Olsem na tupela i pasim tok na spakim papa bilong tupela yet na taim papa i spak nogut tru em i no save, tupela i slip wantaim em na kamapim pikinini.

So em i hat tru, tupela meri yet bai i no inap kamapim pikinini o tupela man tu wankain. Olsem na dispela rot long seim seks em i no wokaut tru long plen bilong God. Tru man na meri, yes em plen bilong Bikpela stret. Pasin pamuk, pasin bilong wokim pasin nogut wantaim narapela man o meri na seim seks em bikpela pekato na em i no wei na pasin bilong Kristen.

# Kristen Lidas Alaiens kamapim Gavanens Seif Gat Polisi

Frieda Sila Kana i raitim

**PAPUA Niugini Kristen Lidas Alaiens (PNGCLA), wanpela ogenaisesen bilong ol lida bilong ol sios i save lukluk long hevi bilong HIV na AIDS nau i kamapim wanpela Gavanens Seif Gat polisi bilong givim stia long ol lida na ol wokman bilong opis long ol i ken mekim gut wok long lukautim mani.**

UNAIDS i bin helpim PNGCLA long kamapim dispela Gavanens Seif Gat long abrusim ol hevi we inap kamap taim ol wokman i no lukautim gut mani o bihainim gut wok bilong mani. Dispela ogenaisesen i bin kirap sampela yia i go pinis long strongim wok bilong awenes na edvokasi long daunim pasin bilong stigma na diskriminesen o pasin bilong bagarapim nem na daunim ol lain i stap wantaim binatang bilong sik HIV na ol lain i gat sik AIDS.

Namba tu siaman bilong PNGCLA na Senia Pastor bilong Agape Intedinominesenel Ministri, Pastor Daniel Hewali, i tok tenkyu long UNAIDS na AusAID na ol narapela lain husat i wok long helpim ol wantaim sampela mani long mekim wok bilong ol. Em i tok tu long sampela hevi we i bin kamap long wok bilong ol na long dispela as ol i no bin inap long kisim moa mani long mekim wok. Tasol Pastor Hewali i tok nau wantaim dispela Gavanens Seif Gat Polisi



Ol grup i holim wan wan kopi bilong Gavanens Seif Gat Polisi. Foto: Frieda Sila Kana

ol i bilip long strongim gut wok bilong PNGCLA.

Pastor Hewali i tok olsem het toktok bilong Wol AIDS Dei long dispela yia em, "Know Your Status, Get Treatment, Live Longer" tasol em i putim nupela tok olsem "Know Your Status, Get Treatment, Receive Jesus and Live Longer".

Pastor Hewali i singaut long ol lida bilong ol sios olsem ol Pastor na ol Pater long dispela Sarere na Sande bipo long Wol HIV na AIDS De long Tunde, ol i mas autim tok bilong God wantaim as toktok i sut long HIV na AIDS na pasin bilong Stigma na Diskriminesen.

Em i tok olsem sik HIV na AIDS i stap na em i no gutpela sik we inap sotim laip bilong man na meri. Tasol bikpela samting em olgeta man tu bai i dai long sampela taim. Long dispela as, olgeta man na meri tu i mas redim laip bilong ol na

ol i mas gat bilip tru na kisim Jisas Kraus insait long laip bilong ol.

Reverend Bernard Saii, Modereta bilong Yunaitet Sios long PNG i mekim tok i go pas long opim wantaim prea. Rev. Saii i givim tok piksa long wanpela man long buk baibel husat i bin lek nogut na i save sindaun long geit bilong tempel inap 38 yia. Em i mekim tok piksa long Aposel Peter olsem, em i tokaut long dispela man olsem, tupela disaipel bilong Jisas i no gat silva na gol tasol, long nem bilong Jisas bilong Nasaret. Peter i givim oda long dispela man bai kirap.

"Yumi olsem Kristen kantri yumi gat wanem samting we yumi inap long givim long ol dispela kain lain husat i gat sik we ol man na meri i no laik long helpim na ol i stap tarangu?"

"Yumi lukim long dispela

stori olsem Aposel Peter i no toktok tasol long dispela man, nogat. Em i brukim baksait i go daun na holim han bilong en long apim em kam antap. Em nau dispela man i kalap na ran i go long tempel," Rev. Saii i tok.

"Ol sios i save autim tok long laikim pasin bilong God tasol yumi no save soim long trupela pasin. Yumi pre planti long ol pipel tasol yumi no save go na lukim ol. Wankain olsem dispela man husat Peter i bin helpim em. Pastaim ol pipel i pre long tempel i no save long em tasol bihain long em i orait na i go insait long tempel, ol lain insait long tempel i wok long askim sapos em i dispela man tasol," Rev. Saii i tok.

Siaman bilong PNGCLA, AsBisop John Ribat bilong Pot Mosbi Katolik Asdaiosis i bin sik na i no bin stap long dispela taim.

## Ol sios long Nu Ailan kisim bikpela helpim

Ahimsa Kibikibi i raitim

OL sios insait long Nu Ailan i kisim bikpela helpim long provinsal gavman bikos ol i stap insait long olgeta ples na tu, ol i helpim ol pipel long ples pastaim long gavman.

Gavana bilong Nu Ailan, Sir Julius Chan, i mekim dispela toktok long taim em i pait strong long sanap wantaim disisen gavman bilong em i mekim long givim i go bek long ol sios, aninit long 'patnasp for progress' polisi blong em.

Em i mekim toktok long bikpela bung bilong nupla seket na tu, makim bilong wanpela nupela talatala bilong Yunaitet Sios long ples Rapontamon insait long Wes Kos Namatanai long wik i go pinis.

Aninit long dispela wokbung or partnasip wantaim sios, Lotu Katolik i kisim K1milien, Yunaitet Sios i kisim K80,000 na Seven de Edventis Sios i kisim K400 thousand Kina.

Ol dispela mani gavman i save kisim bek ripot long em na bikpela lukluk em long skruim ol wok bilong lotu insait long ples, peris, seket o daiosis.

Gavana Sir Julius i amamas long gutpela ripot i kam bek na em i tok em i amamas tru long dispela gutpela wokbung i stap.

## Famili bung bin lukluk long miks marit, imigren na yangpela abrusim marit

I kam long Zenit Nius Ejensi, Vatican

MIKS marit, ol yangpela pipel i abrusim marit na ol imigren famili i sampela long ol samting we bikpela famili sinod o bung we Katolik Sios i bin holim long Vatican, Rom, i bin lukluk long ol.

Bung i bin kamap insait long wanpela mun, bihain long opim long stat bilong mun Oktoba, na pinis long pinis bilong mun yet.

Samting olsem 270 bisop long olgeta hap bilong wol i makim moa long 1.2 bilien Katolik pipel i bin stap long dispela bung long autim ol toktok, tingting, plen na wari bilong ol long famili na ol salens we ol (famili) i bungim long dispela nupela taim tude.

Pater Garas Boulos Garas Bishay, em pasto bilong Sen Mary of Peace long Sharm El Sheih long llijp i bin autim wari bilong em long ol miks marit na ol

turis eria we i sut long ol kalsa i narakain na ol narakain lotu.

Pater Garas i bin tok peris bilong em i stap long turis eria na em i wari long sosio kalsere senis na hevi i save long ol miks marit we inap kamapim bikpela hevi long tupela marit na ol pikinini we tupela bai kamapim.

"Mi wari long ol miks marit namel long ol yangpela Kristen meri pikinini bilong Rasia na Yurop wantaim ol Muslim mangki na man. Ol Islamik Shariah i save larim tasol ol Muslim man i ken maritim ol meri bilong ol narapela lotu, na i no narapela we.

"Dispela kain samting na ol planti maigren na ol re-fuji i wok long go sindaun long Yurop i no kamapim hevi tasol long ol Islam ples o long ol turis eria, no gat, tasol long Wes. Na wok stadi na painimaut i mas kamap long dispela.

"Ol dispela famili wantaim ol miks pasin, kalsa na rilijen... na noken lusim

tingting olsem aninit long lo bilong Islam, man i ken maritim moa long wanpela meri na lo long Koran bilong ol em ol papamama i mas salim ol pikinini i go long Islam skul.

Dispela kain kalsa na rilijen i narakain na i ken kamapim hevi long ol marit na tu, long ol pikinini bilong ol," Pater Garas i tok.

Long sait bilong ol yangepla pipel i abrusim marit, wanpela mausman i makim Saut Korea, Brenda Kim Nayoung i bin toktok long "Sampo generation" o jeneresen we i abrusim pren pasin, marit na karim pikinini.

"Planti yangpela jeneresen bilong tude i givap long dispela tripela samting bikos long sosel presana hevi long mani.

"Planti yangpela pipel i bungim hevi i stap bikos ol i no gat wok na bikos long dispela, ol i no tingting long marit o lusim i go long bihain taim.





**KOMENTRI**

# Ol pipel i no lukim kaikai bilong fri helt sevis

FRI helt sevis i no gat mining bilong en sapos ol pipel i no lukim kaikai bilong en long ol haus sik o helt senta o etpos. Olgeta yia, gavman i wok long putim bikpela mani i go long baset bilong Helt Dipatmen long givim fri besik helt sevis i go long ol pipel. Tasol yumi wok long harim ripot bilong marasin i sot o ol ikwipmen i sot o i bruk daun, o ol arapela saplai bilong wok i sot. Na ol tarangu sikmanmeri i kisim taim bikos i no gat narapela rot bilong kisim helpim long taim ol i sik. Olsem na watpo bai yumi paitim bros oltaim na tok ol pipel i kisim 'fri helt sevis' long taim kwaliti bilong dispela sevis i pundaun i go daun olgeta.

Gavman i luksave long ol dispela komplek bilong ol pipel, olsem na em i kirapim wanpela palamentri komiti nau long painimaut sapos gavman sevis i kamap long ol pipel, luksave long ol hevi i stopim ol sevis na tok save long ol rot bilong stretim gut helt sevis. Memba bilong Goroka long Palamen i siaman bilong dispela komiti. Ol i wok long raun long ol provins insait long kantri long lukim ol haus sik na helt senta na kisim toktok bilong ol wokmanmeri.

Las wik ol i bung long Mosbi long pinisim dispela wok painim na raitim ripot bilong komiti. I gat planti strongpela toktok i soim ples kliia olsem helt sistem bilong kantri i no wok moa. Siaman bilong



komiti yet i tok helt sistem i bruk daun pinis bikos em i no mekim wok bilong givim sevis i go long ol pipel.

Dispela komiti i harim olsem pablik helt sistem i no givim gutpela sevis moa long ol pipel bilong

kantri. Helt sistem i kamap olsem wanpela gavman dipatmen we i gat planti seksen na han bilong en, olsem na i no gat gutpela sevis i go kamap long ol pipel. Tude i gat ol provinsal helt atoriti, pablik hospital bod, provinsal helt dipatmen

na nesanel Helt Dipatmen. Wan wan bilong ol i gat wok bilong ol, tasol ol i paul long husat i bos na bai ol i ripot i go long husat tru.

Narapela samting dispela komiti i painim em dispela hevi bilong marasin i sot oltaim. Eksampel bilong Mosbi Jeneral Haus sik we K5.4 milien i go long baim ol marasin na arapela samting long pinis bilong mun Oktoba, tasol ol dispela samting i no stap long medikol stua. Komiti i kisim ripot tu olsem ol arapela helt senta na etpos long kantri i save bungim wankain hevi oltaim.

Pasin bilong salim ol helt kit i go long ol haus sik tu i no wok gut. Sampela taim ol dispela kit Helt Dipatmen i salim i go aut, i gat ol samting ol helt senta i no nidim na ol samting ol i sot long en i no stap insait long kit. Sampela taim ol i salim ol kit hariap tumas na helt senta bai putim i stap, na long taim ol i laik yusim bai ol marasin i olupela pinis.

Sampela taim, ol dispela helt kit i no go stret long ol haus sik o helt senta, ol i salim i go inap long pos opis tasol na i wet i stap bikos i no gat tok save olsem Helt Dipatmen i salim helt kit i kam. Pasin bilong sekap na kontrolim gut saplai bilong ol marasin long ol helt kit i go aut, i bruk daun pinis.

Planti taim ol pipel i no inap kisim marasin long haus sik bikos saplai i sot olsem na sampela i save baim marasin long ol strit sela. Las wik yumi harim bikpela tok save i kam long Helt Dipatmen

long no ken baim marasin ol pipel i salim nabaut long strit bikos sampela i olupela na i no inap helpim bodi bilong yumi. Helt seketeri i mekim strongpela tok lukaut long ol lain i save salim marasin nabaut long rot, em i tok long holimpasim ol disepla lain na kisim ol i go long polis stesin.

I gat rot bilong helpim ol provinsal haus sik na ol helt senta long lukim olsem i gat inap mani bilong baim ol samting olsem marasin na ol samting bilong helpim ol sikmanmeri. Ol dispela ikwipmen bilong helpim sikmanmeri i no kostim bikpela mani. Sapos helt dipatmen i gat lista bilong ol dispela samting ol helt senta i nidim, orait givim i go long ol Memba bilong Palamen na memba i ken baim anit long provinsal sevis impruvmen program (PSISP) na distrik sevis impruvmen program (DSIP). Olgeta yia gavman i save givim bikpela mani i go long wan wan distrik long kamapim developmen. Mobeta ol i yusim sampela bilong dispela mani long stretim ol helt senta, etpos na ol helt program bilong wan wan distrik. Maski long tromoi olgeta mani i go long wokim ol rot na bris na baim ol konsalten. Tingim helt na laip bilong ol pipel tu.

Yumi hop ripot bilong dispela komiti bai i kisim gutpela bekim long gavman na bai gat gutpela wok i kamap long stretim helt deliveri sistem na givim gutpela sevis i go long ol sikman na meri na ol pikinini bilong dispela kantri.

## Provins mas givim mani bilong ol tisa



OLGETA yia yumi i save harim krai bilong ol tisa olsem Edukesen Dipatmen i no baim ol entaitelmen long wok ol i mekim.

Long las wik yumi harim ol tisa i bung gen long Fin-corp Haus, hetkwata bilong Edukesen Dipatmen na askim Dipatmen long baim ol.

I luk olsem krai bilong ol tisa bihain long olgeta skul yia i laik pinis, i save pundaun long yau pas bilong ol opisa i wok long Dipatmen.

Tasol nau yumi i harim Edukesen ekting seketeri i tok olgeta kain pe em wan wan ol provinsal edukesen opis bai mekim long ol tisa long provins bilong ol.

Olgeta wok het opis long Waigani i givim go bek long ol opis long provins long mekim.

Las yia yumi i harim ol tisa long lsten Hailans na Westen i kisim bikpela

bagarap. Dispela long wanem ol opisa long edukesen opis long dispela tupela provins i no baim gut ol tisa bilong ol.

Em i sori long lukim ol tarangu tisa husat i mekim bikpela wok long givim taim na lainim ol pikinini long kisim save i no kisim olgeta pe we ol i mas kisim bihain long skul yia.

Ol provinsal edukesen i mas baim ol gut.

Tasol taim yumi i sutim tok i go long ol opisa i wok long opis long provins long wankain taim yumi mas

save sapos ol tisa i pulumapim ol fom long kisim entaitelmen bilong ol.

Sampela taim ol tisa i no pulumapim olsem askim bilong ol opis i stap long em, ol tisa i no save pulumapim na bihain ol i singaut na tok dipatmen i no baim ol.

Dispela i no gutpela long wanem asua i stap long ol tisa yet husat i no bihainim tok long ol i mas mekim long em.

Long dispela wik yumi harim siaman bilong Tisa Sevis Komisin i tok bikos long hevi bilong mani long kantri long dispela taim, sampela tisa i no inap long kisim olgeta entaitelmen we ol i mas kisim long en.

Ol bai kisim olsem 70 pesen mani mak tasol long ol entaitelmen bilong ol.

Na husat i no inap kisim malolo entaitelmen bilong ol long dispela krismas bai kisim long narapela taim.

Kain disisen em PNG Tisa Asosiesen i sapotim bikos em i save long kain hevi bilong mani nau kantri i wok long bungim.

Tasol em i tok ol provinsal edukesen opis i no ken yusim dispela tok na i baim ol tisa bilong ol.

Nogat. Ol i mas baim stret tisa bilong ol bikos husat provins i no baim ol tisa bilong ol bai kisim tok long pasin bilong ol.

Em i tok las yia gavman i givim K26 milien long baim entaitelmen bilong ol tisa na dispela yia em i givim samting olsem K33 milien.

Em i tok no gat wanpela provins i mas tok em i no gat mani long baim tisa bilong ol.

Yumi hop olsem ol provins i harim tok na mekim wok stret na givim pe stret long pe we ol tisa i mas kisim long en.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



# Pride of PNG bilong ol Meri Awod

Nicky Bernard i raitim

**C**PL Grup i luksave long ol meri husat i mekim bikpela wok long komyuniti bilong ol, tasol nogat luksave long pablik. Dispela Awod CPL Grup i givim luksave long ol meri husat i mekim bikpela wok tru long helpim komyuniti bilong ol na strongim ol long mekim wok bilong ol.

Wik i go pinis, 6-pela meri bilong PNG i bin kisim luksave i kam long CPL Grup long Pride of Papua Niugini Awod bilong ol Meri.

Dispela 6-pela meri gat liklik stori bilong ol na Awod ol winim long katogori we ol bin mekim long komyuniti bilong ol.

Long namba wan katogori bilong Breveri i go long wanpela meri husat i stap long wanpela setelmen long Pot Mosbi ol kolim long Morata. Dispela meri save bungim ol mama na yangpela meri long givim ol skul tok long lukautim ol yet taim man bilong ol i paitim ol na rabisim ol.

Josephine Durua i save givim skul tok na strongim ol meri long komiti bilong em long Morata long sanap strong na kotim ol man bilong ol sapos ol paitim ol.

Long 2001 wanpela pastor meri bin tok olsem Josephine save mekim sanguma. Na Josephine i wok long mekim long em. Dispela toktok i mekim na famili bilong Josephine i no save stap gut. Man bilong Josephine na ol pikinini save paitim Josephine na rausim em long haus. Dispela mekim na Josephine kisim dispela pastor meri go long kot long 2010 long taun. Josephine tu bin kisim man bilong em na ol famili go long kot long paitim em.

Josephine nau em mejistret bilong liklik komyuniti bilong em long Morata.

Long CARE na COMPASSION CPL i luksave long Delmay Loang, wanpela yangpela tisa bilong Nu Ailan Provins, dispela yangpela meri bin greduaet long Bismark Institut bilong Tising na Trening long Kokopo long Is Nu Briten Provins long 2011.

Taim Delmay i kisim pepa bilong tisa, em no tingting long painim wok long narapela provins, em tingting strong long go bek long liklik ples bilong em long Niu Ailan na lainim ol liklik pikinini long ples bilong em.

Em save lainim ol pikinini long yia 3 i go long 8 long level 0, 1 na level 2. Sampela taim em save lainim ol bik manmeri husat i no save rit na rait. Dispela wok bilong em, em no save askim long pe em mekim fri na long lewa bilong em stret.

Planti bilong ol ples klostu i harim olsem Delmay save tisim ol pikinini gut tru na salim ol pikinini bilong go long lainim rit na rait taim ol liklik yet.

Delmay save tingting papa God long olgeta moning taim em kirap long bed na tok tenkyu long em long givim narapela de long lainim ol pikinini long ples bilong em.

KOMYUNITI SPIRIT bilong dispela yia, CPL i luksave wanpela mama long Oro Provins. Olivia Aripa Bunari, em wanpela nes na

em bin helpim planti ol laip long provins na komyuniti bilong em.

Olivia tu save givim ol skul tok long komyuniti bilong em long lukautim ol long laip stail, givim skul tok long ol mama taim man bilong ol paitim ol na givim skul tok long ol yangpela manmeri long no ken mekim ol hombru bia.

Long 2007, Saiklon Guba kamap long Oro Provins, dispela i mekim mama Olivia i mekim bikpela wok long helpim komyuniti bilong em long Helt, edukesen na helpim ol mama long planim ol gaden kaikai long taim bilong dispela bikpela hevi.

Olivia i lainim ol pikinini long skul na kisim liklik save long rit na rait long nomal wok bilong em olsem nes. Dispela wok bilong em olsem tisa i kamapim bikpela senis long komyuniti bilong em. Em helpim ol mama long komyuniti bilong em long givim sid bilong plawa long planim na kamapim ol naispela plawa long salim. Dispela mani ol mama kisim long plawa bai helpim em painim ol metriel bilong mekim ol klas rum.

Long dispela yia wanpela NGO bilong Australia i lukim hatwok bilong Olivia na ol kam long helpim em givim sampela ol samting bilong eli lening long skul bilong mama Olivia. Dispela ol samting em ol nupela kain samting bilong lainim ol liklik pikinini.

Olivia i givim nem bilong dispela skul Chrispin Kindergarden na dispela liklik skul i save kamap ol gutpela sumatin taim ol go long ol bikpela skul klostu long komyuniti bilong mama Olivia.

Mama Olivia Aripa Bunari, i winim awod bilong Komyuniti Spirit long dispela yia CPL Pride of PNG Awod.

**LUKIM STORI BILONG NARAPELA TRIPELA MERI HUSAT I WINIM AWOD BILONG PRIDE OF PNG AWOD LONG NARAPELA WIK.**

**1** Josephine Durua i kisim Namba wan kategori Breveri Awot. Dispela meri save bungim ol mama na yangpela meri long givim ol skul tok long lukautim ol yet taim man bilong ol i paitim ol na rabisim ol.

**2** Long CARE na COMPASSION CPL Awot, Delmay Lopang i kisim.

**3** Kommyuniti Spirit Awot em Mama Olivia Aripa Bunari i kisim.

*Ol foto: Nicky Bernard*







Lekbris long Tulu 2.

**Stori na poto i kam long WCS PNG Midia**

**O**L ples long Sentral Manus i amamas long opim 4-pela komyuniti projek na sainim nupela konsevesen agrimen wantaim Wail Laip Konsevesen Sosaiti (WCS) long las wik wantaim tingting bilong holim strong ol fores o bikbus bilong ol long bihain taim em i ken givim ol gutpela samting.

Australia Gavman i sapotim dispela projek na PNKA wantaim Pobuma Lokal Level Gavman, ol komyuniti na WCS i wok bung wantaim long kirapim wanpela komyuniti haus bung, praimer skul haus, wanpela lek bris bilong wara na wara saplai long ol ples Tulu 1, Tulu 2 na Lahapau long notkos na Djackal long sautkos bilong Manus.

Ol i sainim wantaim 5-pela komyuniti long notkos insait long Pomuti, Ndrehet, Kurti na Andra

(PNKA) LLG na 4-pela nupela agrimen ol i sainim wantaim ol komyuniti long saut kos insait long Pobuma LLG long las wik Konsevesen agrimen i karamapim 43,500 bilong fores insait long Sentral Manus.

Long taim bilong opim ol dispela 4-pela projek, ol wod kaunsil bilong 9-pela komyuniti long saut na not kos bilong Sentral Manus, i sainim nupela konsevesen agrimen wantaim Manus Provinsal Atoriti long na WCS.

Dairekta bilong WCS, Dokta Richard Cuthbert i tok olsem ol dispela samting i lukim ol gutpela wok bilong WCS i bung wantaim komyuniti long Sentral Manus na ol lokal level gavman.

"Mipela bilip olsem bikbus bilong Sentral Manus inap long stap gut wantaim gutpela lukaut bilong ol asples yet. Dispela bai holim ol bus na diwai long stap longpela taim bilong helpim ol pipel wantaim ol kain kain samting bilong stap strong long taim bilong klaimet senis i kamap." Dokta Cuthbert i tok.

Australia Dipatmen bilong Foren Afes na Treid (DFAT) mani we i kam aninit long Manus Sapot Komyuniti Diverlopmen (MSCD) inisetiv bai givim sapot long putim 9-pela moa komyuniti projek. Ol dispela projek em ol praimer skul klasrum na komyuniti haus bung, sampela toilet na wara saplai.

Aninit long agrimen, wan wan komyuniti i makim wanem prairiti projek bilong ol olsem hap bilong Wod Plen bilong ol na bai wanbel long givim han long leba na ol timba bilong wokim projek. Bihain long dispela ol komyuniti bai wanbel long ol i no ken larim ol loging kampani long kam insait na katim ol diwai bilong industri o long katim bikpela bus tumas long wokim ol egrikalsa projek long graun bilong ol.

Australia DFAT mani aninit long MSCD em i wanpela liklik hap bilong bikpela mekpas mani bilong helpim ol pipel bilong Manus long ol i wanbel long holim Rijonal Prosesing Sentra bilong ol Refuji.

"Manus Sapot Komyuniti Diverlopmen Inisetiv i amamas long wok i kamap pinis wantaim helpim bilong WCS na ol komyuniti bilong PNKA na Pobuma LLGs, na i laikim dispela pantasip bai kamapim moa wok i stap long plen bilong ol dispela hap blong renfores," Greg Hosea, projek menesa bilong MSCD inisetiv i tok.

Casper So'on, Wod Kaunsila bilong Tulu 2 we ol i bin putim nupela lekbris i tok, "Mia mamas long dispela lekbrin bikos ol klen sif bilong mipela i mekim disisen long lukautim ol fores bilong mipela wantaim WCS. Ol i bin sapotim mipela wantaim fanding i kam long ol patna, LLG, Manus Gavman na Australia Gavman."

Sentral Manu i gat wanpela bilong ol laspela bikpela eria bilong bukbus we ol i no katim ol diwai bilong wokim ol timba yet insait long Bismarck Ailan. Dispela fores i gat planti kain ol diwai na bus we i holim bikpela kabon we PNG i nidim long daunim hevi bilong klaimet senis, we i givim gutpela samting long ol ples lain long sindaun na laip bilong ol.



WCS i givim komyuniti haus i go long ol 1 komyuniti.



Opim nupela lek bris long Tulu 2.



# Wol nius long poto



Sumatin Farhad Jabar, i gat 15 krismas i bin stap insait long wanpela sutaut wantaim ol polis bihain long em i bin kilim dai polisman Curtis Cheng long Parramatta. Poto: ABC

## Teroris birua long Australia

SAMTING olsem 12-pela man na ol yangpela man husat i ken wokim teroris pasin i stap insait long komyuniti long Australiai, ol polis i tok.

Ripot i kam long ABC program, Four Corners, i tok dispela pasin bilong kilim dai polisman Curtis long Parramatta i pas wantaim teroris wok na gavman i singaut long ol famili i mas pait egensim terorisim, namel long ol em ol yangpela pikinini.

Dispela 12-pela i hap long bikpela grup i gat 19 man na ol yangpela mangki na 7-pela i stap long kalabus nau. Ol i kisim moa long 300 pipel i go long kot long ol sas bilong teroris, stat yet long taim ol i bin statim Operation Ap-

leby long mun Septemba las yia.

Dispela em i wanpela bikpela operesen egensim ol teroris long Australia. Planti long ol lain em ol i mekim ol wok painimaut long ol moa long wanpela yia pinis.

Bos bilong ol kaunta teroris wantaim Federel Polis bilong Australia, Neil Gaughan, i bin tokim Four Corners olsem ol i putim gut ai long wanpela grup husat i ken mekim ol wok bilong ol teroris.

"Mi bilip strong olsem i gat wanpela liklik grup long Sydney husat i laik bagarapim kain laip bilong ol pipel bilong Australia, Asisten Komisina Gaughan i tok.

I gat pret olsem ol teroris lain i wok long rikrutim o kisim ol yangpela man long joinim ol.

## Washington Post bos long Iran i kalabus



Fail poto bilong Jason Rezaian na meri bilong em Yeganeh Salehi bilong Iran. Poto: ABC

Em no klia tumas watpo Iran i no givim ol ripot long disisen bilong kotim Jason 39 krismas. Iran i sutim tok olsem em i wanpela spai bilong Amerika.

Ol i no tokaut Jason bai stap long kalabus long hamas krismas, tasol wanpela man long judiseri long Iran i tok em i no inap long givim moa toktok bikos long kain rilensensip namel long Amerika na Iran we i no gutpela tumas.

Ol i bin holim pasim Jason long Julai, 2014.

## Hikaps i kamapim biknem long liklik mangki

Nem bilong liklik mangki husat i bin hikap taim em i singim nesenel entem, i pairap nogut tru long intanet em Nathan Hall. Em i bilong Adelaide, Saut Australia.

Tasol wanem samting tru i mekim em long hikap i go i go inap long singim nesenel singsing bilong Australia i pinis, em ol i no klia.

Dispela i mekim na nau Nathan i kamap wanpela intanesenel intanet sta.

Kylie, mama bilong Nathan i tok pikinini bilong em i bin gat hikaps 24 aua bipo long stat bilong pilai we em bai singsing long en, tasol taim ol i ran long kar, hikaps bilong em i bin pinis.

Tasol taim em i singsing long taim pilai i laik stat, hikaps i bin kamap bek.

Nathan nau kamap wanpela biknem pikinini na em i wok long kisim singaut long planti intaviu.

Nathan i tok planti intaviu tumas, olsem 10-pela em i go long em pinis long moning i



Liklik mangki, Ethan Hall i gat 7-pela krismas i kamap stret long intanet. Poto: ABC

mekim em i tait o les, na em i no bin go long skul long neks de.

Taim em i hikap long taim em i singim nesenel entem, papamama bilong em i tok aiyoo, dispela i no ken bagarapim naispela nek bilong Nathan bikos em i wanpela gutpela liklik singa.

## Paris teroris birua sevaiva toktok

Wanpela meri Austrakia husat i bin kisim bagarap long taim ol teroris i kilim ol pipel long Paris, Frans long tupela wik i go pinis, i stori long wnem samting i bin kamap.

Emma Parkinson husat i gat 19 krismas, i stori long wanem samting i kamap long Bataclan tieta. Ol teroris i bin sutim Emma Parkinson bilong Tasmania, Australia, long Bataclan haus piksa. Em i tok ol pipel insait long tieta i bin pret nogut tru long taim ol teroris i sutim ol pipel. Ol pipel i wok long ol lukim musik ben i pilai taim ol teroris i bin go insait na kilim dai 89 pipel.

Em i tok em i bin laik kalapim banis i go aut, tasol ol i sutim em taim em i bin pas long waia banis.

Em i tok tieta i bin pulap long ol lain i bin kisim bagarap, blut i wasim olgeta. Emma i tok taim em i harim pairap pas-taim, em i ting olsem dispela em ol paiawok tasol ya. Tasol watpo paiawok i kamap long konsat? Emma i bin tingting. Em i tok em i bin amamas taim ol polis i go kamap long helpim ol.

## Reclaim Australia reli i kamap long Melbon

SAMTING olsem 150 pipel i bin stap insait long Reclaim Australia reli o mas long las wiken, Sarere.

Polis i bin holim 6-pela pipel na stopim moa trabel we moa long 1,000 pipel i wokim demonstresen long dispela mas bilong Kisim Bek Australia. Ol i karim plak bilong Australia na singsing na wokabout.

Dispela i bin hap bilong nesenel de long anti Islam protes i kamap long olgeta hap bilong kantri.

Polis i tok no gat man i bin kisim birua o dai long ol dispela protes mas.

Wanpela man i bin tokim ABC, "Mi laikim ol pikinini bilong mi i gat



Ol lain i bin stap long Reclaim Australia protes mas. Poto: ABC

wankain gutpela laip mi nesenel entem, gat ol bilong ol na i no ol Jihad gat nau long en, singim Krismas kerol long ol skul teroris i bagarap ol."

## Moa teroris trabel long Beljum

OL polis i karim gan na wokim ol reid long Brasels, kapitel bilong Beljum na holim pasim 16 pipel bihain long praim minista i tok long strongim sekyuriti long siti bikos moa bikpela trabel inap kamap.

Praim Minista, Charles Michel, i tok ol ples we ol teroris bai tagetim em ol mal, soping strit na pablik transpot hap.

Long wankain taim tu, ol polis i no painim yet strongpela teroris, Sala Abdesalam. Ol polis bilong Frans i wok long painim em bihain long teroris birua i kamap long Paris. Ol skul i bin pas na ol tren i no ran long taim



Ol polis i putim ol strongpela klos na gan na mekim wok long Brasels, kapitel bilong Beljum. Poto: ABC

ol dispela trabel na opere-sen i wok long kamap long Brasels.

Bikpela wok painim i kamap long Beljum bihain long tupela teroris Brahim

Abdeslam na Bilal Hadfi, i save stap long Beljum.



Em nau! Ol pikinini i ken painim rot i go long ples wantaim Wantok kru...



**Kanage bilong Hailans**

Kanage bilong Hailans, na em i sisen bilong kapul long hap bilong em. San yet em i raun painim batri bilong tos bilong em, nait long em nau em tokim lik-lik pikinini bilong em olsem, "Boi bai yu kam wantaim mi bai mitupela go painim kapul long bus. Orait tupela i kisim bunara na tos na wokabaut i go long hap we kanage i save bai gat kapul.

Taim tupela i kamap pinis kanage i tokim pikinini bilong em pikinini yu sanap tamblo na mi go antap, pikinini tu i bihainim long baksait na go sindaun long brens klostu long we papa i laik traim kapul long en.

Kanage i no lukim pikinini bilong em i sindaun klostu, em i sutim kapul pinis na em i singaut long pikinini bilong em na pikinini i bekim, oh papa mi stap! em i harim pikinini i bekim klostu tasol na i ting olsem graun i klostu tasol, samting tru graun i stap longwe tru.

Hariap tru kanage i kalap i go daun, em i lukim olsem graun i longwe, em i wok long tromoi han i go kam na holim pas brens bilong diwai. Na em tudak tu na tos i lus pinis, na brens em hangamap long en em stap klostu tasol long graun.

Kanage i ting brens em hangamap long em i stap longwe tru long graun na i hangamap i go inap tula.

Mangie P.S



**Asua long kaikai**

Wanpela taim Kanage raun long taun istap, em lukim ol manmeri kaikai na em kisim bikpela bagarap long hangere; tasol samting true m ino gat moni long baim kaikai.

Em i wokabaut isi tru igo na sanap long wanpela haus kai bilong ol Saina. Em kirap tokim saina man olsem wanpela chicken chips plastik wantaim plastik coke.

Saina man kisim na givim long Kanage, sem taim stret em holim plastik kaikai long han na em ron i go – ol polis ting em stilim wanpela bikpela samting na em ron. Ol i kisim gun na sutim lek bilong em na kisim i go long kalabus.

Wally Anis  
W.H.P




Ol wod lista hia:

- ANSA
- AIBIKA
- AUTIM
- BANARA
- BANISIM
- BLUT
- DIWAI
- FRAIDE
- GOHET
- HAPTUMORA
- HEVEN
- KAMAN
- KATIM
- KRISMAS
- LOMAN
- LOMBO
- MAMBU
- MAMI
- MEYA
- PANDOL
- PASINDIA
- PETISEN
- PLAUIM
- RAITHAN
- SEKEN

G D T N R F F E O G C C A O H P V A M A  
 G W O N P C L N T X O L E M E Y A V S T  
 C N N U T V H A S E K E N R V E S Z T G  
 A M I J T E O I H F R A I D E M G G G V  
 A J B H Y E V B A N I S I M N S S U F R  
 U O Q S A R E I P A S I N D I A E A E S  
 P A C S F T M K T D M N M L B L U T T X  
 K A N E Z M Y A U D A B E G O H E T L P  
 M A A T D E E Z M M S A O D D M V Q Q I  
 O Z D X Y I E S O R R N N L U R B S I G  
 C M S N Y R W L R E E A G B I K A O F A  
 S A U T I M W A A S P R M E U S I Q F E  
 M I R R R T F E I N S A O R I C S F P E  
 R F D S G R P T T R M F S C O O H R N M  
 H H U H U S E L H D R P S E G E P S E X  
 S A D F I P G K A T I M S D G A V S I P  
 E T T N N B I I N U F Q K R S J O V M E  
 B I G L D Z M E E U I E W X G R P M R S  
 U X E D T A O E R K A M A N V T S E M S  
 Q M M O M Y E L L N A S N N F M S E F P

Ansa bilong Wod Pilai isu 2149







# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)

## Toktok long PNG i rausim tambu long fres egrikalsa kaikai i kam long Australia

Caroline Tiriman i raitim

**PLANTI** bisnis long sait bilong ol fres kaikai na tu, ol pipel wantaim ol bisnis grup i amamas long lukim Papua New Guinea bai rausim pastaim tambu long baim ol kaikai na prut i kam long Australia.

Long mun Ogas long dispela yia, Minista bilong Egrikalsa, na Laipstok, Tommy Tonscoll, i bin putim tambu long baim ol kaikai na prut i kam long Australia na Nu Silan long wanem, em i bin tok em i laik helpim ol PNG fama long groiml displea kaikai na salim yet long kantri.

Tasol dispela tingting bilong gavman i bin mekim planti bisnis lain na tu, ol pipel i wari long wanem, ol i tok PNG i no nap yet long saplaim kaikai long olgeta hap bilong kantri.

Narapela samting em dispela tambu i bin kamap tu long taim bikplea hevi bilong draut o bikpela san i wok long hamarim kantri.

Joseph Saina em i bilong Australian Horticulture Exporters As-



sociation i tok, planti long ol fama long Australia tu i bin wari long dispela tambu, tasol nau ol i amamas long harim olsem ol i ken salim gen sampela kaikai i kam long PNG.

Maria Linibi presiden bilong PNG Women in Agriculture, i bin wanpela long ol lain husat i bin wok long askim minista long stap isi pastaim long wanem, dispela taim nogut i bagarapim tu ol fam long PNG yet. Nau em i tok em i

wanbel long minista i rausim pas-taim sampela long ol dispela tambu.

Sif Eksekutyutiv i askim Praim Minista Peter O'Neill sapos em i tingting bilong gavman tru long mekim o em i tingting bilong minista tasol.

Mista Conn i tok tu long wari bilong ol pipel long dispela taim ol stua long Pot Mosbi i nogat ol kaikai olsem tomato, anien na pototo.

## PNG, Solomon Islands na Vanuatu i makim Universal Children's Day

Sam Seke i raitim

LONG Universal Children's Day, em i taim bilong promotim welfe na ol rait bilong ol pikinini long wol. Long Papua New Guinea, Solomon Ailan na Vanuatu, planti handed pikinini i makim dispela de wantaim ol Just Play soka na arapela ektiviti o program bilong ol pikinini.

Just Play em i wanpela spot program we i stap pinis long 6-pela Pasifik ailan kantri we gavman bilong Australia na UNICEF i helpim.

Em i wok long kamapim ol rait bilong ol pikinini, nesanel aidentiti bilong ol, helt, edukesen na jendaikwaliti.

Long Solomon Ailan, planti handed skul pikinini i bin stap insait long ol Just Play ektiviti long Honiara.

Just Play Projek Menesa long Solomon Islands, Maria Rarawa i tok ol i bin givim bonde setifiket i go h long 200 ol pikinini bing makim dispela Universal Children's Day.

Mis Rarawa i tok dis-

pela setifikete i bilong lukim olsem ol pikinini ya i kisim rait bilong nesanel aidentitibilong ol - na em i pruf olsem ol i stap ol sitisen blong kantri.

Long Port Vila na Luganville long Vanuatu, planti skul pikinini ibin wokim tu ol Just Play aktiviti bilong makim dispela de bilong ol pikinini.

Just Play Projek Menesa long Vanuatu, Rorona Kalsakau i tok long Port Vila ol pikinini i bin pilaim ol gem olsem soka, kriket na rugbiyunion aktiviti.

Long Papua New Guinea, Just Play program i karamapim pinis ol 4-pela rijon long kantri.

Moa long 100 pikinini long 6 pela skul i bin stap insait long ol ektiviti long Sir John Guise Stadium long Pot Mosbi we PNG Football Association Presiden, David Chung, nau i bin opim.

Leo Jakanduo, Midia Opisa bilong PNG Football Association i tok tenkyu long help bilong gavman bilong Australia na UNICEF long Just Play we help long ol ol bikpela isiulung ol pikinini long kantri.



Ol pikinini i makim Universal Children's Day long Pot Mosbi wantaim Just Play we Presiden biong PNG FA David Chung tu stap longen. Foto: ABC

## 2015 Miss Solomon Ailan resis

Sam Seke i raitim

SOLOMON Ailan i go het nau long wanpela kompetisen o resis we 8-pela yangpela meri i stap insait long makim wanpela Miss Solomon Ailan. Memba bilong Miss Solomon Ailans Pageant Komite, Grace Hilly i tok long las wik Fraide, ol i bin bilasim ol yet na i go long ol flout long ol strit bilong Honiara.

Mis Hilly i tok tumora bai ol i stap insait long wanpela speech o toktok kompetisen.

Na long Krauning Nait bilong Miss Solomon Ailan, Praim Minista Sogavare nau bai ges bilong ona.

Mi Hilly i tok wina bai makim Solomon Ailan long 2015 Miss Pacific Islands Pageant bai ol i holim long Cook Islands long Disemba.



Ol yangpela meri Solomon long Miss Solomon kwes wantaim Praim Minista bilong Solomon Ailan.

## Ol Vanuatu MP i lusim apil keis

Sam Seke i raitim

APILS Kot blong Vanuatu i rausim apil bilong ol 14 memba bilong palamen husat i agensim konviksen na mekim save em Suprim Kot i bin givim long ol sas bilong korapsen na braiberi.

Apils Kot tingting long Fraide apinun i bin rausim tu apil agensim

wei Presiden Lonsdale i bin rausim marimari o pardon em Ekting Presiden, Marcellino Pipite i bin givim long em yet na ol arapela.

Dispela i minim olsem, olgeta 14 MP ya bai go het long stap long kalabus long taim em i bin makim long ol na em namel long tripela yia igo inap long fopela yia.

Long nau, Deputi Spika bilong Vanuatu i singautim ol memba bilong palamen bai bung gen long namba 14 Disemba bilong toktok long baset.

Long wankain taim tu, Niusman Hilaire Bule i tok kaunsel bilong ol minista i laik long pinisim palamen na holim ol nupela ileksen.



Polis iu kisim ol Vanuatu MP i go long kalabus.

## Solomon Ailan bai lukim planti moa saiklon

Sam Seke i raitim

Dairekta bilong Solomon Ailan Mitiorolojikel Sevis, David Hiriasia i tok kantri i ken lukim planti moa saiklon long dispela taim bilong saiklom.

Mista Hiriasia i tok ol rekod i soim olsem i gat moa saiklon long Solomon Ailan long taim bilong El Nino weda sistem, moa long taim bi-

long La Nina.

Em i tok saiklon taim long Solomon Ailan i stat long Novemba i go inap long Epril, tasol i luk olsem em bai dilei o ino inap kam hariap long dispela yia.

Long nau, Mista Hiriasia i tok i bin gat sampela ren i pundaun long sampela hap bilong kantri, tasol em i tok em i no nap long pinisim ol

hevi long sait long draut.

Em i tok ailan bilong Bellona long daunbilong long kantri nau i bungim long moa hevi long taim i nogat ren long longpela taim.

Mista Hiiriasia i tok pipel long Bellona i wok long kisim sampela helpim long sait bilong wara i kam long ol atoriti na pipel biong ol yet i stap long Honiara.



# Link PNG i kisim sata kontrak

**LINK PNG (LPNG) i winim prais long las wik Sande bilong givim ol sata sevis long Exxon Mobil PNG Limitet bilong tripela yia long las wik Sande.**



operet long ol trensit sevis long Moro long Sauten Hailans provins wan wan wik.

Jenerel Menesa bilong LPNG, Daniel Wanma i tok welkam long namba wan ran bilong balus long Mande

2 Novemba i tok LPNG i amamas long givim Exxon Mobil PNG ol sevis bilong ol na tokim ol long ol bikpela sefti stendet bilong ol.

Mista Wanma i tok, 'Long makim maus bilong Bot bilong LPNG na mama kampani, Air

Niugini, mipela laik klia long bikpela sefti stendet na gutpela prektis long narapela tripela yia na luksave olsem mipela i bungim laik bilong yupela.'

Link PNG wantaim Air Niugini i save operet long 6-pela bikpela ol kontrakta, we i save operet long 60 ran bilong balus, na karim olsem 2, 000 pasindia long wanpela wik.

## Girua bai kamap intenesenel ples balus



**Ol Kokoda waria o man bilong pait i tok welkam long Gavana Juffa na delegesen bilong PNG Air long Girua ples balus, Popondetta.**

GIRUA ples balus long Popondetta, Oro Provins bai kamap wanpela bikpela intenesenel ples balus insait long PNG, Oro Gavana Gary Juffa i tok.

Gavana Juffa i tok dispela ples balus long Popondetta bai kamap bikpela ples balus bihain long China Railway Construction & Engineering Company i pinisim ol konstraksen wok long apim stendet bilong dispela ples balus.

Dispela kampani bai putim nupela banis bilong ples balus, putim kolta na kirapim nupela

ples bilong balus i pun-daun.

Girua em i wanpela ples balus we em i save pulim planti turis i kam long Australia na Japan.

"Planti turis i save kam long Popondetta long lukim Kokoda Trek na ol ples insait long Oro we Wol Wo 2 i bin kamap bipo.

"Ol turis i kam long Australia na Japan i save kam long Pot Mosbi pastaim na bihain ol i save kisim balus gen long kam long Popondetta,"Gavana Juffa i tok.

Em i tok ol konstrak-

sen wok bai pinis klostu taim tasol. Taim ol konstraksen wok i pinis, ol turis bai go stret long Popondetta. Em i tok dispela ples balus bai helpim ol manmeri Oro long go stret long ovasis.

Menesing Dairekta bilong Nesenel Eapots Koperesen, Joseph Tupiri i tok gavman i gat plen long kirapim Girua i kamap wanpela bikpela ples balus bikos Oro Provins i save pulim moa turis i kam insait long PNG.

Em i tok ol konstraksen wok bai pinis klostu taim tasol na dispela

em i wanpela han mak bilong O'Neill-Dion gavman.

"Mi amamas long gavman i putim mani long kirapim Girua na ol arapela ples balus olsem Kagamuga long Mt Hagen,"Mista Tupiri i tok.

Tasol em i no tokaut long mani mak bilong dispela projek.

PNG Air, Link PNG, Tropic Air na arapela balus i save karim ol turis na pasindia i go kam long Girua ples balus.

Long flai long Pot Mosbi i go long Girua em i 25 minet tasol.

## Papua LNG Projek bai no inap kamap hariap

NAMBA tu LNG projek long PNG bai no inap kirap hariap bikos wel na ges prais i go daun long intenesenel maket na ol projek patna bilong dispela projek i no save gut long hamas ges stret i stap insait long graun.

Papua LNG Projek em i nupela nem bilong pastaim ol i bin kolim Galp LNG Projek na dispela bai kamap namba tu ges projek long PNG bihain long PNG LNG Projek we ExxonMobil i ranim.

Total E & P PNG bilong kantri Frens i kisim ples bilong InterOil long Ogas 2015 na i kamap nupela opereta bilong tupela bikpela ges fil long Galp provins we ol

i kolim Elk na Antelop. Elk na Antelop ges fil i kam aninit long Petroleum Ritensens Laisens namba 15 o PRL 15.

Ol projek patna bilong Papua LNG Projek em ol Total E & P PNG (40.1 pesen), InterOil (37.1 pesen) na Oil Search (22.8 pesen).

Ges bilong kirapim Papua LNG Projek bai kam long Elk na Antelop ges fil. Total E & P PNG i wok long mekim ol drilling wok long dispela tupela ges fil long sekim gut hamas ges stret i stap long graun.

Menesing Dairekta bilong Total E & P PNG, Philippe Blanchard i tokim PNG Maining na Petroleum Invesmen

Konpresen long Tunde long Pot Mosbi olsem tupela ki samting we ol projek patna i lukluk long kirapim em;

- risos asesmen na
- wel na ges en-vauiromen.

Mista Blanchard i tok risos asesmen bai tok klia long hamas ges stret i stap long PRL 15. Ol bai drilim ol wel insait long PRL 15 na painimaut hamas ges i stap aninit long Elk na Antelop wel.

"Taim mipela i save long hamas ges i stap, dispela bai larim mipela i tokaut long sais bilong LNG Projek," Mista Blanchard.

Wel na ges en-vauiromen em i toktok

long intenesenel ges maket we prais bilong wel na ges i wok long go daun.

"Mipela bai sekim na glasim gut wanem samting i wok long kamap long wel na ges maket. Dispela bai tokim mipela long hamas mani ol projek patna bai nidim long kirapim dispela projek,"Mista Blanchard.

Em i tok Total E & P PNG i wok long kisim gutpela sapot long nesenel gavman na Galp Provinsal gavman.

"Mi laik tok tenkyu long provinsal gavman bilong Galp Provins na Nesenel Gavman long sapot tupela i wok long givim long mipela.



## INVESTMENT TOKTOK wantaim DR. STEPHEN NASH

### PNG Nesenel Baset na ol globol developmen - Hap 1

Sapos yu gat sampela askim, plis salim ikam long mipela long [toktoksuper@nambawansuper.com.pg](mailto:toktoksuper@nambawansuper.com.pg) na mipela bai bekim.

Long dispela toktok, bai mipela skelim sampela hap bilong baset, na long neks mun, bai mipela lukluk long wanem samting i stap insait long baset, na glasim wanem ol samting dispela baset i laik kamapim.

Ol bikpela ikonmik salens i kamap long wol i mekim ol gavman wantaim ol ki ikonmik institusen olsem World Bank, na IMF, long skelim na daunim Global ikonmik gro fokus bilong 2015 na 2016. I tru ol dispela senis i kamap, bihainim wanem samting i kamap las yia, ol samting long ol bikpela kantri i wok long kamap gut gen, tasol gro long ol nupela maket na ol nupela ikonmi bai i stap daunbilo yet, bikos sampela bikpela nupela maket ikonmi i no strong tumas na ol kantri i save salim oil. Figure 1 i soim Wol Gros Domestik Prodak (GDP) na PNG GDP, we NSL i ting bai i gat moa sotpela taim hevi i kamap, i no wankain olsem wanem samting Gavman i ting bai kamap, tasol bihain bai gat gutpela helpim i kamap, long LNG 2.




Figure 1: Source, NSL/IMF/DoT/KFM

#### Ol bikpela samting insait long Baset:

- **Ikonmi:** Bikpela wari i winim pundaun bilong mani ol LNG i bin kisim i kam insait long kantri, em prais bilong ol komoditi. Prais i stap daunbilo tru na i no inap bringim inap mani long ol developmen plen bilong bihain taim. Mani i kam insait i stap daunbilo tru bikos mani i kam long LNG i daunbilo tru, tasol bikos ol bisnis i redi gen long stat wantaim LNG 2, i gat moa lain na wok i redi.
- **Kirap nogut long reveniu:** Wanpela bikpela samting i bin kamap ples klia long dispela baset, em long mak bilong mani we gavman i ting bai ol i kisim, bai i no inap long kamap nau.
- **Daivesiti bilong fand:** Sapos Gavman i tok tru long fanding daivesiti, olsem em i soim long ol Baset pepa, orait em i mas hariap long givimaut ol CPI link bon bilong PGK.
- **Bon isuens resenelaisesen:** Tingting bilong bungim wantaim na tokaut long BPNG bon em i wanpela gutpela rot.
- **Sovren bon:** Rot bilong givim aut ol long-tem bon em i gutpela aidia, bikos bai i ken daunim rolava risk bilong Gavman, givim aut sovren bon long USD i kamapim moa foren eksens risk bilong Gavman.
- **Stet entaprais:** Taim nogut nau i wok long mekim Gavman i strong long kamapim gut ol bisnis bilong en.
- **Praivetaisesen:** Gavman i wok long salim ol aset long prais em Gavman i ting i gutpela, na dispela baset i ting praivetaisesen bai kamap long dispela kain gutpela mak, na em i ting bai kamap long dispela kain wei, na
- **Retings:** Tude ol reting i sanap long dispela mak B+ LT domestik na Foren, na B ST domestik na Foren, long negativ autluk. Ol reting bai stap long dispela mak nogut, maski sapos ol daungred i kamap bihain.

Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIKPELA, GUTPELA, EM I SEIF, STRONGPELA NA I NAMBAWAN**



# NSL memba ken baim smat pon long K99

**OL memba bilong Nambawan Super (NSL) i ken baim nupela mobail pon bilong bmobile-vodafone long K99 tasol.**

Aninit long wanpela patnasip namel long bmobile-vodafone na NSL, ol memba bilong NSL i gat sans long baim wanpela smat pon long K99 tasol.

Prais bilong dispela smat pon em i K199 tasol bmobile-vodafone i givim 50 pesen diskaun long ol memba bilong NSL long baim dispela pon.

50 pesen diskaun i katim K100 na ol NSL memba i ken baim dispela pon long K99 tasol.

NSL na bmobile-vodafone i wanbel long amamasim ol memba bilong NSL na tupela kampani i larim dispela promosen i kamap.

Sif Eksekutiv Opisa (CEO) bilong NSL, Garry Tunstall i tok ol NSL memba husat i gat ID kad tasol bai gat sans long baim dispela mobail pon.

Sapos ol i nogat NSL membasip kad bilong ol, ol bai no inap long baim dispela mobail pon, Mista Tunstall i tok.

"Gutpela samting bilong dispela mobail pon em long larim ol NSL memba i yusim nupela mobail teknologi na mekim laip isi," Mista Tunstall

Ol NSL memba i ken yusim

dispela mobail pon long sekim balens bilong ol, kisim stetmen o mekim ol arapela samting we ol i nap long go long brens na mekim.

Dispela mobail pon i gat wanpela spesel app bilong NSL i stap insait na em bai sevim taim na mani bilong ol NSL memba long go long brens na mekim ol samting.

Mista Tunstall i tok tenkyu long bmobile-vodafone long larim ol NSL memba i baim ol smat pon long K99 tasol.

Grup Sif Eksekutiv Opisa (CEO) bilong bmobile-vodafone, Sundar Ramamurthy i tok tenkyu long NSL i wokbung wantaim bmobile-vodafone long helpim ol manmeri i yusim nupela mobail teknologi long mekim laip isi.

"Mipela i amamas long NSL i wokbung wantaim bmobile-vodafone. Dispela nupela patnasip bai helpim ol NSL memba long sekim akaun balens bilong ol long mobail pon.

"Ol bai no moa go long ol brens bilong NSL, sanap long lain na kambek ong narapela de long sekim ol samting long brens.

"Ol i ken mekim olgeta samting long mobail pon tasol," Mista Ramamurthy i tok.



Mista Ramamurthy (lephan) na Mista Tunstall i soim dispela smat pon. Foto: Nicky Bernard

## Kumul Petroleum lukluk long pawa saplai

NESENEL wel na ges kampani bilong PNG Kumul Petroleum Holdings (KPH) i lukluk long saplai pawa long kantri, Menesing Dairekta Wapu Sonk i tok.

Mista Sonk i tokim Maining na Petroleum Invesmen Konprens long Pot Mosbi olsem KPH bai no inap long lukluk long wel na ges projek tasol em bai sapotim PNG Power long saplai pawa long kantri na senisim laip bilong ol manmeri.

Mista Sonk i tok pawa saplai em i wanpela nambawan samting we gavman i tingting long kamapim aninit long Nesenel Konten Plen bikos pawa i save kirapim groa bilong GDP bilong kantri.

"Kumul bai wokbung wantaim gavman long kirapim ol wel na ges projek long kantri. Gavman i makim mipela olsem stet nomini long olgeta wel na ges projek insait long kantri.

"Tasol mipela bai lukluk long pawa saplai tu. Mipela i saninim pinis wanpela agrimen wantaim PNG Power long saplai pawa long kantri," Mista Sonk i tok.

Em i tok aninit long dispela agrimen, PNG Power i kisim pinis 25 mega wat pawa saplai i kam long PNG LNG Plent sait na dispela pawa i wok long saplai Pot Mosbi siti.

"Sampela moa wok i wok long kamap long saplain gen 50 mega wat pawa saplai long Pot Mosbi," Mista Sonk i tok.

KPH i gat 16.5 pesen ekwiti sea long PNG LNG Projek. Mista Sonk i tok GDP grot i save kamap gut taim kantri i gat gutpela pawa saplai na manmeri i gat gutpela sindaun.

"Aninit long dispela tingting, mipela i laik kirapim katri bilong yumi. Mipela i laik stretim ol samting long larim ol manmeri i gat pawa saplai.

"Ol i ken yusim pawa saplai long mekim bisnis na kamapim gutpela sindaun," Mista Sonk i tok.

Em tok tu olsem KPH bai kamapim wanpela petrokemikel plent long Pot Mosbi. Aninit long wanpela agrimen KPH i bin sainim wantaim Sojitz Corporation bilong Japan, tupela kampani bai kamapim dispela petrokemikel plent long Konebada Petroleum Pak ausait long Pot Mosbi.

KPH bai kirapim wanpela nupela skul long skulim ol yangpela manmeri PNG long wok long wel na ges industri, Mista Sonk i tok.

"Insait long liklik taim tasol, mipela i mekim planti gutpela samting na mipela i laik wokbung wantaim ol projek patna bilong mipela olsem Oil Search and ExxonMobil," Mista Sonk i tok.

## Saveman: Japan gutpela LNG maket

JAPAN em i wanpela gutpela maket bilong LNG na gavman i mas mekim olgeta samting long larim Japan i baim LNG bilong PNG.

Dispela em i toktok bilong wanpela saveman long wel, ges na eneji industri.

Siaman bilong Global Energy Facts Group, Dokta Fereidun Fesharaki i tokim Maining na Petroleum Invesmen Konprens long Pot Mosbi olsem PNG i gat gutpela pasin bilong wokbung wantaim Japan na dispela i mas go het yet sapos gavman i laik salim LNG bilong PNG i go long Japan.

Dokta Fesharaki i tok LNG i gat tripela bikpela maket long wol na ol dispela maket em ol Esian maket, Yuropen maket, na Ameriken maket.

"Tasol planti kantri i wok long kamapim LNG. Dispela em i wanpela samting we i kamapim prais bilong LNG na wel long

wol i go daun.

"Kain kantri olsem Japan, Saina, Taiwan, Saut Korea na India em ol biknem kantri husat i save baim LNG long Esia maket.

"Tasol Japan em i gutpela maket stret. Maski prais bilong LNG i go daun, Japan i save baim yet long mani mak we em i bin wanbel pinis long baim," Dokta Fesharaki i tok.

Em i tok PNG gavman i noken lusim Japan sapos PNG i tingting long kirapim ol arapela LNG Projek.

"Mi amamas long Praim Minista Peter O'Neill i mekim planti gutpela samting long stretim wokbung namel long Japan na PNG.

"Dispela wok i mas go het yet. Gavman i mas holim strong Japan sapos em i laik salim LNG i go long Japan bikos maket long Japan em i gutpela tru," Dokta Fesharaki i tok.



## Port Moresby to Port Vila

**Our schedule** Pt Moresby-Pt Vila WED 1000HRS | Pt Vila-Pt Moresby THU 0800HRS

**Air Niugini connecting Melanesia.**

Call Toll Free on 180 3444 or contact your nearest Air Niugini Travel Centre or Travel Agent for further details.

**Air Niugini**   
www.airniugini.com.pg





# Ramu NiCo soim rispek na luksave long PNG kastom-pasin

**RAMU NiCo Menesmen (MCC) Limited em namba wan maining divelopa bilong kantri China long kirapim wok maining long nikel na kobalt long graun bilong PNG long Madang provins.**

Ramu NiCo i gat bikpela rispekt olsem PNG i gat kastom na pasin tumbuna i stap we ol lokal pipel i bilip long en.

Wankain olsem PNG, ol China pipel tu i gat planti ol strongpela kastom o pasin tumbuna we ol save bihainim long mekim ol pipel i stap bung-wantaim na strong na sapotim sindaun na laipstail bilong ol yet.

Long las wik Sarere, November 21 wanpela seremoni o liklik kibing i bin kamap long Lalok namba 4 viles long Astrolabe Be LLG, we ol pipel kilim pig na wokim kastom pasin na planim 'tanget' long kontrolim rot bilong Minzeng riva.

Dispela kastom pasin na bung em ol pipel bilong Lalok viles yet i ogenaisim bikos ol i tok Minzeng riva arere long ples bilong ol i save kamapim planti bagarap long gaden kaikai, kes-krop na tu graun blong ol. Olsem na ol i kilim pik, wokim kaikai na tu planim tanget na tromoi ston long wara na dispela bai wokim riva i bihainim stret rot bilong wara i ron na noken kamapim hevi na bagarap.

Komuniti Afes Jeneral Menesa, Martin Paining na deputi bilong em, Yuan Zhi i bin go stap long dispela seremoni na lukim ol pipel bilong Lalok i wokim dispela kastom pasin.

Ol wokman bilong Ramu NiCo olsem ol enjinia bilong China tu i bin stap long lukim dispela pasin kastom i kamap.

Ramu NiCo i helpim Lalok komyniti long baim wanpela bikpela pig na tu givim sampela kaikai long helpim ol pipel long dispela kastom wok.

Kaunsila bilong wod 7 long Lalok viles, John Merit i tok tenkyu i go long Ramu NiCo long givim wanpela pig na tu givim bikpela ekskeveta masin bilong en long wokim wok long digim graun long wara na kontrolim Minzeng riva long ron long rot stret.

"Mipela save olsem em kastom pasin bilong ples bilong mipela,

tasol gutpela pasin Ramu NiCo i soim long joinim mipela tude na tu givim pig em bikpela samting tru," Mista Merit i tok.

Em i tokaut olsem Lalok viles na ol arapela viles antap i bin bungim planti bagarap pinis pastaim bikos long Minzeng riva. Taim wara i tait, ol pipel

Tresesa bilong Kostal Paiplain Lenona Asosesin (LOA), Jeffery Kina i tokaut olsem bikpela hevi ol pipel long Kostal Paiplain i save bungim oltaim long sisen bilong sen em ol bikpela wara i save tait. Olsem na nau ol pipel i traim yusim kastom pasin wantaim beten tu i go long Papa God long helpim ol long kontrolim rot bilong wara long Minzeng riva.

Mista Kina i tok tenkyu long Ramu NiCo long halivim bilong en long stretim rot klostu long Minzeng riva na tu yusim ol masin bilong en long digim wesana long wara na larim wara i ron stret na noken bagarap ples arere.


Mista Paining i tok Ramu NiCo i wok klostu wantaim ol pipel long Kostal Paiplain eria long sait long agrikalsa bikos dispela bai helpim ol pipel long bihain-taim taim maining projek i pinis.

Long nau yet Ramu NiCo i kamapim ol kakao neseri long Lalok namba 4, Raiga, Sagar na Bom long helpim ol famas long groim gutpela kakao em

Mista Paining i tok amamas long ol Lalok pipel long wok bung wantaim olsem tim long lukim gutpela senis i kamap long ples bilong ol.

Em i tok Ramu NiCo (MCC) bai go het yet long wok wantaim ol pipel blong Lalok na ol komyniti long Kostal Paiplain bikos 135 kilomita paiplain bilong Ramu NiCo Projek i ron namel long graun na eria bilong ol.

1. Planim tanget olsem 'stop oda' long wara noken bagarapim ples.
2. Ramu NiCo wok lain soim rispekt na holim tanget.
3. Serim buai long soim wanbel na pasin blong wok-bung wantaim.
4. Bikpela ekskeveta masin bilong Ramu NiCo stretim ron bilong Minzeng riva.





# PHAMA - nupela rot bilong PNG egrikalsa eksport

## De bilong luksave long ol pikinini

Frieda Sila Kana i raitim

**PAPUA Niugini nau i gat nupela rot bilong salim ol egrikalsa kropa i go ovasis long helpim ol fama, na tu ol lain bilong kisim pis long solwara.**

Long las wik Fonde 19 Novemba, wanpela ogenaisesen bilong Australia na Papua Niugini i kamapim nupela program long lukim moa egrikalsa prodak i go aut olsem eksport.

Pasifik Hotikalsa na Egrikalsa Maket Akses (PHAMA) Program bai helpim ol fama na ol praivet sekta wantaim ol gutpela save long wei bilong stretim ol kes kropa na ol egrikalsa hotikalsa prodak na long painim ol rot bilong salim i go ovasis.

Dispela ogenaisese i kamap pinis long ol narapela Pasifik kantri na ol i lukim olsem em i wok gut long helpim ol lokal fama. PHAMA i bin stat long 2011 long Fiji, Samoa, Solomon Ailans, Tonga, na Vanuatu wantaim mani sapot i kam long Australia na Nu Silan. Ol dispela kantri nau i save salim ol kain samting olsem taro na ol narapela samting i go long Nu Silan na Australia.

PHAMA Program bai givim save long ol lokal fama i kamapim moa samting bilong salim na kisim mani kam insait long ol rurel eria long PNG. Planti populesen stap long ol rurel eria tasol liklik lain tasol i save yusim graun bilong ol long kamapim ol



**Tim i makim ol patna insait long dispela program (long lephan i go long raithan) PHAMA Tim Lida Guy Redding, AECOM Projek Menesa-Intenesenel Developmen Sarah Nicholson, Australia Hai Komisn Minista Kaunsela Rod Hilton, Seketeri bilong Dipatmen bilong Egrikalsa na Laipstok Dokta Vele Pat Ila'ava na Australia Hai Komisn Kaunsela Jodie McAlister. Foto: Australia Hai Komisn Midia**

kes kropa bilong salim i go ovasis.

Australia Hai Komisn Minista Kaunsela, Rod Hilton husat i bin stap long opim bilong woksop i bain tokaut olsem Australia bai givim AU\$5 milien wantaim eid program PHAMA long PNG.

"Wantaim developmen patnasip bilong mipela long PNG, Australia i wok long helpim praivet sekta i groim ikononi bilong PNG long kamapim moa wok na daunim poveti," Mista Hilton i tok.

Seketeri bilong Egrikalsa na Laipstok, Dokta Vele Ila'ava i bin toktok long taim bilong opim woksop. Em i amamas long lukim dipatmen bilong em i wok

wantaim ol narapela teknikel ogenaisesen long kamapim gutpela wok long ol kes drop eksport.

"Mipela i gat hop olsem PHAMA bai helpim mipela long stretim sampela hevi bilong painim gutpela maket bilong ol kes kropa we i save bungim mipela.

Mi amamas long lukim dispela program bai strongim wok bilong dipatmen bilong mi wantaim ol narapela teknikel ogenaisesen." Mista Ila'ava i tok.

Ol wok bilong PHAMA bai karamapim ol dispela kain wok olsem; helpim komyuniti sekta long kamapim plen bilong helpim

ol komoditi sekta long kamapim ol plen bilong developmen nid na eksport, helpim wok bilong kamapim gut kwaliti standet bilong kakao na kopi, statim wok bilong opim rot long kisim kwarantn bilong ol kaving na hendikraf long ol i ken go salim long ovasis, givim helpim long kamapim moa spais na soklet prodak na eksport.

Long PNG, PHAMA bai kam aninit long AECOM na ki patna bilong em Nesenel Egrikalsa Kwarantn na Inspeksen Atoriti (NAQIA), Fres Produs Developmen Egensi, Nesenel Fiseris Atoriti, ekspota na komoditi bot.

YUNIVESEL de bilong ol pikinini i kamap long Novemba 20, em de bilong ol bikipela manmeri na ol papamama long luksave long ol nid bilong ol pikinini.

Long Nesenel Kapitel Distrik (NCD), Powes Parkop, i givim mani long wanpela amamas de wantaim ol program bilong ol pikinini long yunivesiti bilong Papua Niugini (UPNG) long Uli Beier bilding.

Ol program olsem yoga, bal gem, danis kompetisen, resis bilong askim ol kwesten, mekim ol haus bilong bauns we planti pikinini i amamas long en na ol i givim lans kaikai long olgeta.

Planti pikinini i kisim prais long ol hatwok bilong ol long luksave long ol strong bilong ol.

Spesel Projek Opisa bilong Gavana, Keke Aiga, i makim maus bilong Gavana Parkop i tok het tok bilong de bilong ol pikinini we NCD i sponsa em 'Give What They Need'.

'Edukesen em i rait bilong wanpela pikinini na dispela inisietiv bilong Gavana long bungim ol pikinini long kam amamas long dispela de i gat edukesen bilong em tu,' Misis Aiga i tok.

Em i tok em i rait bilong ol pikinini long selebretim dispela de na singautim olgeta lida, gavman na ol bisnis ogenaisesen, ol NGO na ol sios grup long wok bung wantaim na moa pikinini i ken joinim dispela selebresen, long NCD o narapela hap tu.

'Ol pikinini em ol lida bilong tumora na mipela nid long trenim ol gut na luksave olsem ol i kisim olgeta samting ol i gat rait long en olsem, edukesen, helt, kaikai, wara, gutpela haus na gutpela famili i laikim ol,' Misis Aiga i tok.

Namel long dispela pikinini em ol strit pikinini long Is Boroko Mango Main setelmen na ol narapela pikinini long Talai, 8 Mail na Morata husat i laikim tru Yoga.

## Kavieng holim bung bilong ol elda ... Ted Diro bai opim bung

Ahimsa Kibikibi i raitim

GAVANA bilong Nu Ailan, Sir Julius Chan, i tokaut olsem namba 6 kibung bilong ol bikman/meri o elda bai kamap long hetkwata, Kavieng, long mun i kam.

Dispela bung i save bringim wantaim ol bikman/meri tasol nau, ol lapun wantaim long kisim tingting na save bilong ol long planti kain hevi insait long provins na moa long en, ol ples ol i kam long em. Kain miting olsem i save kamap insait long olgeta yia.

Long dispela yia, pastaim Komanda bilong PNG Defens Fos, Brigadia Jenerel Ted Diro bai opim kibung.

Mista Diro i soim wanbel bilong em long go na em i tok bai yusim taim long strongim gen poroman wantaim provins na tu wantaim Sir Julius.

Dispela em longpela taim gen bihain long kempen long Vanuatu i mas kisim independens.

Dispela tu em i bin laspela taim we Mista Diro i bin go pas long kisim PNG i go long helpim narapela brata kantri bilong em insait long Pasifik.

Dispela bung bai kamap long Disemba 2,3, na 4.

Samting olsem 125 ol bik man/meri bai kamap long dispela taim long toktok long ol bikipela hevi na developmen bilong Provins.

## MELL Nius Megesin i kamap

MELL Review em i wanpela kala nius megesin bilong Papua Niugini stret na em bai kamap long olgeta wan wan mun.

Dispela nius megesin em i bilong Mell Risets na Maketing Konsalten Limited i stap long ATS insait long Nesenel Kapital Distrik.

Namba wan nius em i kamaut long dispela mun na em i bilong mun Septemba na Oktoba.

Dispela namba wan kopi em i stori long ol praim minista bilong bipo na i mekim luksave long ol gutpela wok ol i mekim pinis na stori bilong ol long ol i go daun long sia bilong ol na larim ol yangpela na nupela lida i kam antap.

Dairekta bilong Mell Risets na Maketing Konsalten na bilong Mell Riviu Megesin, Michael Mell i tok, "Long dispela isu mipela i laik tok tenkyu na gut-bai long ol las 7-pela praim minista.

Dispela em i bungim Prais Minista Peter O'Neill wantaim bikos em i stap namel long olupela na long nupela.

Long nambatu isu bilong Novemba na Desember, Mell Riviu bai toktok long 2016 baset na



**Mista Junior Wama – Projek Menesa bilong Mell Riviu wantaim Menesing Dairekta, Michael Mell i holim wanpela piksa bilong Mell Riviu nius megesin. Foto: Frieda Sila Kana**

wanem samting em bai i kamap.

Em i tok, megesin bai gat hap bilong ol pipel i ken givim ol pablik vii o tingting bilong ol long ol sosel, political na ikononik developmen bilong PNG.

"Dispela nem Mell Riviu em nem we Menesing Dairekta bilong Nesenel Developmen Benk i givim long mi, taim mi go lukim benk long kisim helpim long bisnis bilong mi," Mista Mell i tok.

Junior John Wama, wanpela

Papua Niugini man yet i kamap projek menesa bilong Mell Riviu. Dispela megesin bai ol i salim long K130 na em bai stap long ol hai skul olsem referens buk na tulung ol yunivesiti.

Nau yet em ol i wok long salim long ol wan wan man na ol bisnis haus olsem ol hotel na buk stua. "Kala bilong megesin em i yelo, ret, wait na blek olsem nesenel kala na em bai stap olsem tasol," Mista Mell i tok.



# Australia na PNG i amamasim de bilong ol Yunivesel pikinini



Presiden bilong Papua Niugini Futbol Asosiesen na Osenia Futbol Asosiesen, na Vais Presiden bilong FIFA, Davis Chung, wantaim ol sumatin long 'Just Play' festival long Sir John Guise Stediam.



Ol sumatin i toktok long sait bilong sosel ektiviti bilong ol.

## MOA long 500 pikinini insait long 5-pela skul i bin bung long Sir John Guise Stediam long Pot Mosbi, na stat wantaim long prais ol i winim long 'Just Play' festival.

Long dispela festival, futbol i kamap olsem tul bilong lukluk long skulim ol pikinini aninit long 4-pela ki eria olsem helt na welbing, jenda ikwaliti, sosel sait bilong ol pikinini, na lukautim ol pikinini long gutpela wei. Presiden bilong PNG Futbol Asosiesen na Osenia Futbol Konfederesen, na husat i Vais-presiden bilong FIFA tu, David Chung, i stap wantaim long taim bilong opim festival.

Chung i bin toktok long gutpela sait bilong spot long ol pikinini na i tok olsem, "Ol pikinini i save gro wantaim spot na ol pilai, na dispela em ol namba wan hap we ol i ken gro bikpela"

"Spot i no save helpim ol long gro tasol, nogat. Em i save helpim ol long planti samting bikos em i rait bilong ol long pilai."

Ol skul pikinini na tisa i go stret long pilai graun long ogenaisim futbol pilai, bihain long ol i bin singim nesenel antem na sampela ol gutpela toktok we ol biklain long futbol i givim.

Pilai i bin kamap namel long ol skul insait long tupela aua.

Ol i bin gat dispela tingting bilong kamapim festival bikos long bungim ol skul husat i kamapim 'Just Play' program long wan wan komyuniti bilong ol insait long 6-pela wik program.

I no long soim ol samting ol i bin lainim insait long 6-pela wik tasol, nogat. Bilong larim ol pikinini long kamapim poro wantaim ol pikinini long ol narapela skul tu.

Wantaim sapot bilong Australia gavman na Yunion bilong Yurop Futbol Asosiesen (UEFA), 'Just

Play' developmen program i bin stat long PNG long yia 2011.

Ol i bin lonsim dispela program long Pot Mosbi olsem pilot program na karim aut i go long Lae long wankain yia.

Nau, dispela program i stap pinis long olgeta 4-pela rijon na ol i operet nau long 7-pela hap olsem Pot Mosbi, Bougainville, Kimbe, Simbu, Goroka, Madang na Wabag.

Eking Hai Komisina bilong Australia long PNG, James Hall, i tok, "Spot bilong Australia long developmen program i save strongim ol toktok bilong jenda ikwaliti.

"Spot em i tul bilong senisim tingting bilong ol meri. Mi amamas bikos 49 pesen bilong ol lain husat i stap wantaim long Pasifik Spot Patnasip program em ol meri.

"Stat long yia 2009 inap nau, Australia gavman i investim \$6.44 milien aninit long rijinal Pasifik Spot Patnasip (PSP) program wantaim PNG pinis.

"Long yia 2014 inap 2015, PSP program i sapotim 149, 0 85 lain i pilai aninit long kriket, futbol (soka), ragbi lig, ragbi yunion na tenis bal," Hall i tok.

## Sempion bilong Sogeri Lig i kisim ples long Sauten Konfederet

SEMPION bilong Sogeri Lig gren fainel, Fasi Dunas, i kisim ples long Sauten Konfederet klap sempionsip bihain long em i winim taitel bilong lig long las wik Sande long larowari Sekenderi pilai graun.

Developmen opisa bilong Sauten Konfederet, Kila Vere, i mekim dispela tok save bihain long em i bin lukim dispela gren fainel pilai.

Fasi Donas em i wanpela tim long ol narapela afiliet tim bilong Sauten Rijon husat bai pilai long resis bai kamap long pinis bilong dispela mun.

fainel i tok tenkyu long ol eksekutiv bilong lig long pinisim dispela sisen wantaim gren fainel.

Mairi i tok tenkyu tu long sponsa bilong lig, Eda Ranu, na i tok, "Eda Ranu i save mekim gut na i save givim planti taim long ol komyuniti wok bilong em na i save sapot long bikpela wei long promotim na developom ragbi lig long Sogeri eria."

"Mipela i no bin mekim ol dro bilong Sauten Konfederet yet bikos mipela laikim Sogeri lig long pinisim sisen bilong em na kisim ples long sempionsip," Mairi i tok.

Gren fainel bilong A gret bilong Sogeri lig i bin kamap namel long Fasi Duna na Rux

Tigers we Dunas i daunim Tigers 10-6.

Long wankain taim, Sogeri Seagulls i daunim ol Sirinumu Pukpuk 24-22 long B gret.

Pilai bilong tupela tim i strong tumas na tupela i dro 6-6 long hap taim.

Namba tu hap bilong pilai i kamap strong tumas we tupela tim wantaim i strongim banis bilong tupela.

Ol Dunas i strong tumas na putim wanpela trai long namba 60 minit na i skruim poin i go antap 10-6, tasol kik i no go insait.

I no gat wanpela trai gen i kamap inap ol i bungim pinis bilong pilai.

Dunas i kisim K2000 prais mani na ol Seagulls i kisim K1000 long hatwok bilong ol.

## Namba wan taim bilong Albay Vulcans long pilai Ragbi



ALBAY Vulcans i pilai long Filipin Nesenel Ragbi Lig (PNRL) em i namba wan taim bilong ol long pilai.

Faunda bilong Albay Vulcans ragbi klap, Ric Raymond Ballen, i save long ragbi gut tru.

Em i bin stap bod memba bilong PNRL long yia 2013 na em i ki man long ogenaisim ol Filipino tim long Oktoba, 2013 na kamapim Clark 9s tonamen.

Long 2014, Ballen i bin kamapim PNRL histori long Filipin taim em i bin ogenaisim namba wan 9s tonamen wantaim ol Papua Niugini sumatin husat i save skul long Clark siti, Filipin.

Ballen na famili bilong em i bin lusim asples long 2014 na i go stap long Legazpi siti

Sauten tip bilong Filipin.

Em i bin lus tingting long ragbi inap em i statim wanpela klap bilong em yet na i tok, "Mi save olsem futi em i blut bilong mi, tasol wok i mekim na mi lus tingting long spot na stap long dispela provins."

Long Oktoba 16, 2014, wanpela pilaia bilong PNRL 9s, Victor Valentine Costuna, bilong Canberra i stap yet long Filipin long taim bilong Holidde na i ranim ragbi lig klinik long Cotmon Nesenel Haiskul wantaim ol wanskul bilong em Luke Jarman, Jake Battenally na pilaia bilong Manila yunion, Val Cabigting.

Ballen i kamapim Albay Vulcans tim long dispela tim na afiliet wantaim PNRL na

nau ol bai pilai namba wan gem bilong ol egensim Manila Storm.

Ballen i tingting long groim ragbi lig spot long Filipin na long dispela as, em i laik salensim ol tim husat i save pilai pastaim long lig.

"Mipela i save olsem Storm i save pilai strong na mipela i bin lukim olsem em i bin pilai wantaim ol Hong Kong long sampela wik i go pinis. Nau mipela laik helpim wanpela na narapela long kamap strong moa yet, na dispela bai soim olsem mipela i ken ogenaisim Ragbi lig pilai long lokal level long Filipin," Ballen i tok.

Ballen em i kosa bilong Albay Vulcans na i ting olsem dispela pilai bai

kamap strong.

Ballen i tingting long putim Albany Vulcans long PNRL, tasol i no gat wanpela tim long pilai egensim ol na em i tingting long kisim tim bilong em i go na pilai long yunion.

"Mi save olsem Storm i gat bikpela ekspirien long pilai, tasol em i bin pilai wanpela gem pinis," Ballen i tok.

"Mipela bai wok hat long soim ol olsem mipela i redi long pilai long Lig sisen bai kamap long yia i kam."

Dispela namba wan pilai bai kamap long Desemba 11 long Bicol Yunivesiti pilai graun, na Karangahan festival tu bai kamap long wankain taim.



# Royals man i winim gren fainel premiasip

**Royals tim bilong ol meri i sempion**

**Philemon Tame i raitim**

**ROYALS A gret tim bilong ol man i winim gren fainel premiasip bilong Pot Mosbi Ragbi Futbal Lig long Murray Bareks pilai graun long las wik Sande.**

Gren fainel resis i bin kamap namel long ol Royals na Brothers we skoa i sanap olsem 26-16.

Resis bilong tupela i kamap wankain, tasol ol Royals i strong moa long las 10-pela minit na i putim 2-pela trai long daunim ol Brothers.

Long namba wan hap long stat bilong pilai, huka bilong ol Brothers, Stanley Olo, i putim wanpela trai na kik i go insait. Ol Brothers i stap pas wantaim 6 poin.

Royals i no bin westim taim long bekim trai bilong ol birua we winga bilong ol, William Aquila, i bin putim wanpela trai long wing, tasol kik i no go in-

sait na ol Brothers i stap pas yet 6-4.

Wankain pilai bilong ol Brothers, huka Olo i putim narapela trai gen bihain long ol Royals i putim trai, na i skruim poin i go antap long 12 taim kik bilong ol i go insait.

Ol Royals i bihainim ol yet i kam na bekim trai bilong ol gen long narapela sait bilong wing. Laki tru, kik bilong ol i go insait na Royals i sot wantaim tupela poin long bungim ol Brothers 12-10.

Ol i bin bungim taim bilong malolo long sotpela taim tasol, bihain long ol Royals i putim namba tu trai bilong ol.

Long namba tu hap bilong pilai, pilai bilong tupela i kamap strong tumas na moa long 1000 manmeri na pikinini i banisim pilai graun we i nogat wanpela liklik spes i stap long sait bilong pilai graun.

Pilai i kamap strong moa yet we ol sapota bilong tupela tim i

sanap long sait na i wok long strongim sait bilong tim bilong ol wantaim bikmaus, tasol i no gat wanpela birua pasin i kamap bikos ol soldia i stap klostu na lukautim pilai gut tru.

Ol Brothers i putim namba tri trai bilong ol na i stap pas yet, tasol ol i no laki bikos dispela em i las trai bilong ol na kik i no go insait. Brothers i skruim skoa i go antap long 16.

Brothers i no lusim ol Royals na i go long we, nogat. Royals i wok long bihainim birua bilong ol i kam inap taim ol i bin bekim namba tri trai bilong ol Brothers long 10-pela minit i stap yet long bungim pinis bilong pilai. Kik bilong dispela trai i go insait na skoa i sanap olsem 16-16.

Banis bilong tupela tim wantaim i strong moa yet long dispela taim, tasol long 74 minit Royals i putim narapela trai gen we kik i no bin go insait na ol i stap pas 20-16.

Royals i no westim taim na putim narapela trai gen long 78 minit na skruim poin i go antap long 26-16.

Royals i winim K11, 000 prais mani taim ol Brothers i kisim K6, 000 long ol i bin kamap namba tu long resis bilong dispela sisen.

Royals em i tim bilong ol polis na wanpela pilaia bilong ol i kirap na i tok, "Sutim ol long gan," taim dispela las trai bilong ol i kamap.

Ol Brothers i bin sambai long gren fainel, tasol ol Royals i hat wok no gut tru i kam inap ol i daunim ol Brothers.

Wanpela sapota bilong ol Brothers i tok, "Ol Brothers i lus bikos taim bilong ol fainel i bin kamap, ol i bin haiarim ol narapela pilaia na rausim ol pastaim pilaia husat i save pilai inap long fri- sisen bilong ol i stat. Ol dispela pilaia husat ol i bin rausim ol i gat bel hevi yet i stap na ol i bin pilai gren fainel, na long dispela as tasol ol Brothers i bin lus."

**Philemon Tame i raitim**

MERI tim bilong ol Royals i kamap sempion bilong Pot Mosbi Ragbi Futbal Lig (POMRFL) gren fainel resis i bin kamap long Murray Bareks pilai graun.

Gren fainel bilong ol meri i bin kamap sampela minit bipo long gren fainel bilong ol man long las wik Sande. Royals i daunim ol Souths 14-12 na i kisim premiasip bilong 2015 POMRFL resis.

Taim pilai i stat, ol Souths i stap pas 6-0 poin we Nancy Digal i ran i go na abrusim banis bilong ol Royals na i putim namba wan trai na Janet Johns i putim kik i go insait.

Long 37 minit bilong pilai, Digal i kisim bal i go insait na i putim namba tu trai gen bilong ol Souths, na ol i stap pas yet inap ol i bungim taim bilong malolo.

Isi tasol ol i putim kik bilong namba tu trai i go insait i skruim skoa i go antap long 12-0.

Souths i stap pas yet, tasol Helen Jared na Fredah Waula bilong ol Royals i putim namba wan na namba tu trai long namba tu hap bilong pilai i bringim skoa i go antap long 8.

Royals i no westim taim long putim namba tri trai we Naomi Kaupa i skoarim na i skruim poin i go antap long 14 taim kik bilong dispela trai i go insait.

Royals i abrusim ol Souths 14-12, na i stap pas. Banis bilong tupela tim wantaim i strong inap ol i bungim pinis bilong pilai na Royals i win wantaim tupela poin.

Royals i winim K5, 000 prais mani taim ol Sauts i kisim K3, 000 long ol i kamap namba tu ples.



Sempion bilong 2015 gren fainel, ol meri Royals i daunim ol Sauts na i sanap long kisim prais mani bilong ol long Murray Bareks pilai graun long las wik sande.

## Sponsa bilong Royals i amamas

### I kam long bek pes...

Kiap i tokaut olsem NCD bai go het long sponsa long Pot Mosbi Vipers.

Long wankain taim, Mairi i tokaut olsem Royals i kisim ples long pilai long Sauten Konfederet klap sempionsip.

Het kosa bilong ol Brothers, Leonard Tarum, i wanbel long ol pilaia bilong em long ol i go insait long gren fainel bilong dispela sisen.

"Ol i mekim sampela liklik asua klostu long taim i laik pinis i mekim na ol Royals i win, tasol mi wanbel long ol pilaia bilong mi bikos ol i go long gren fainel," Tarum i tok.

"Mi tok tenkyu tu long ol sponsa bilong PRL, SP Breweri, long sponsa long dispela resis long dispela

ya na klap sponsa bilong mipela, Parisco Limited, long sponsarim Brothers Ragbi Lig klap long olgeta taim.

"Nau mipela i lukluk long sisen bai kamap long ya i kam, 2016," Tarum i tok.

Long wankain taim, Francis Ona bilong Simbu TNA Lion, Gerard Philip, i bin stap tu long Murray Bareks pilai graun tu long las wik Sande.

Philip i kam long lukim dispela gren fainel bikos em i bin tok olsem i gat sampela pilaia bilong em i pilai.

"Mi kam long lukim ol skil bilong ol pilaia na pikim sampela sapos ol i abrusim ol mak bilong seleksen," Philip i tok.

Linking our Country

LinkPNG extra services to WAPENAMANDA now open for booking

Friday 08th January and 13th January 2016  
Monday 21st December and 11th January 2016

Reservations – Toll Free: 1800 5463 Email: sales.linkpng@airniugini.com.pg  
Find us on Facebook: www.facebook.com/linkpng Online sales: www.airniugini.com.pg

LinkPNG





TRAIM GEN: Ol meri Sauts Pawa i sanap bihain long gren fainal pilai bilong ol long Pot Mosbi Rabgi Lig.



TENKYU: Kepten bilong ol Brothers i kisim prais bilong long kam namba 2 long gren fainal pilai bilong wantaim ol Royals long PRL resis.



ROYALS YA: Kepten bilong Royals i hapim sil bilong ol bihain long ol winim gren fainal bilong Pot Mosbi Rabgi Lig taim ol daunim ol Brothers.



TIM ROYALS: Ol meri Royals wantaim ol tim opisol amamas long trofi ol winim long gren fainal.

OL POTO NICKY BERNARD




Straika bilong Hekari i pasim bal go long wan pilaia bilong em taim kepten bilong Gigira i ron long pasim em. Hekari i win 4-2.



KAM KISIM: Stail winga bilong Royal i redi long pasim bal taim pilai bilong Brothers i traim long stopim em.





**IMPROVED TASTE!** Niupela teist wantaim planti mit na oil. Teistim na bai yu laikim moa yet.

## DIANA

Tuna



Emi tuna  
bilong PNG

PROUDLY  
PNG  
MADE

Manufactured by




RD Tuna Canners Ltd

Moa mit na  
oil insait



TUNA IN OIL

# Sponsa bilong Royals i amamas



Bai yu go we: Lep bek bilong Gigira Laitepo Gabriel Kanamon i stopim midfilda bilong Hekari long namba tu pilai bilong Nesenel Soka Lig i kam long Pot Mosbi long wiken. Hekari i soim moa strong long daunim Gigira 4-2.

Poto Nicky Bernard

### Philemon Tame i raitim

GREN Fainal win bilong Royals tim bilong ol man na tim bilong ol meri i mekim na sponsa bilong tupela, Black Swan Intanesenel, i no lus tingting long sponsa dispela tupela tim gen.

Asisten jenerel menesa bilong Black Swan Intanesenel Limited, Andrew Scottney-Tursill, i amamas long Sande taim em i lukim tupela tim bilong Black Swan i win na kampani i kisim biknem.

Scottney-Tursill i makim maus bilong CEO Bryan Kelly na i tok, "Tupela tim wantaim i pilai gut na winim dispela gren fainel."

Birua tim bilong meri Royals, PNG Ports South, i stap 12 taim Royals i no kisim wanpela poin inap ol i bungim hap taim, tasol ol Royals i putim 3-pela trai long namba tu hap bilong pilai na daunim ol.

Het kosa bilong ol Royals, Sammy Rice Jackson, i tokhat wok bilong ol i karim kaikai na ol i winim dispela resis.

Scottney-Tursill i tokaut olsem sponsasip bai go het long ol yia i kam.

Ol i pinisim fainel wantaim Scottney-Tursill i givim K100 prais mani long ol wan wan pilai na opisal.

Faiv-eit bilong ol, John Simon Wamil, i kamap nambawan pilai na i kisim prais mani inap long K1100 we wan wan sponsa olsem PRL Siaman, Dr James Naipo, i givim K100, Sauten Konfederet Dairekta, Gwaibo Mairi, i givim K200, PNG-GRFL Siaman, Sandis Tsaka, i givim K100, wokman bilong Australian Difens Fos, Kolonel Blair, i givim K100, Black Swan Intanesenel i givim K500 na Deputi Siti Menesa, Honk Kipa, i givim K100.

I go moa long pes 26

● Lukim spots poto long pes 27 ● Royals tim winim gren fainols - pes 26

## Strongpela Marasin Bilong Kus Gutpela Prais!

Good Products, Better Prices, ikam long

 Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

